

清歸安張師誠輯 海鹽徐槐廷徵義

# 義徑又徑中徑

佛陀教育基金會 印贈

# 徑中徑又徑徵義 目錄

佛祖開示念佛	5
雲棲大師勸修淨土	7
徵義自序	9
徵義張序	11
徑中徑又徑徵義卷上	13
起信法	13
醒迷門	13
輯醒迷門	13
易行門	24
輯易行門	24
析疑門	31
輯析疑門	31
徑中徑又徑徵義卷中	39
立願法	39
決定門	39
目錄	3
徑中徑又徑徵義	4
輯決定門	39
廣度門	46
輯廣度門	46
徑中徑又徑徵義卷下	50
勵行法	50
精持門	50
輯精持門	50
兼觀門	64
輯兼觀門	64
斷受門	69
輯斷受門	69
飭終門	75
輯飭終門	75
助行門	84
輯助行門	84

## 佛祖開示念佛

彌陀經言。聞說阿彌陀佛。執持名號。一心不亂。其人命終。阿彌陀佛。現在其前。即得往生極樂國土。無量壽佛經言。至心念佛一聲。滅八十億劫生死重罪。無量壽經言。一向專念阿彌陀佛。願生彼國。即得往生七寶華中。住不退轉。文殊般若經言。繫心一佛。專持名字。念念相續。即是念中得見過去現在諸佛。楞嚴經言。若衆生心。憶佛念佛。現前當來。必定見佛。不假方便。自得心開。大本彌陀經言。念佛之人。有四十里光明燭身。魔不能犯。寶積經言。他方衆生。聞阿彌陀佛如來名。乃至能發一念淨信。歡喜愛樂。所有善根。回向願生彼國者。隨願往生。得不退轉。直至成佛。隨願往生經言。普廣菩薩白佛言。何故經中讚歎阿彌陀佛刹。七寶諸樹。宮殿樓閣。諸願生者。皆悉隨彼所欲。應念而至。佛告普廣。汝不解我意。娑婆世界。人多貪濁。信向者少。習邪者多。不信正法。不能專一。令諸衆生專心有在。是故讚歎彼佛國土。悉隨彼願。無不獲果。目連所問經言。我說無量壽國。易往易取。而人不能修行

往生。反事九十六邪道。我說是人。名無眼人。名無耳人。十往生經言。若有衆生念阿彌陀佛。願往生者。彼佛即遣二十五菩薩。擁護行者。一切時。一切處。不令惡鬼惡神。得其便也。智度論言。有諸衆生。謗般若。墮惡道。雖修餘行。不能得出。後遇知識。教行念佛。方得解脫。永明壽禪師言。有禪無淨土。十人九差路。陰境若現前。瞥爾隨他去。無禪有淨土。萬修萬人去。但得見彌陀。何愁不開悟。古德言。若人以四天下七寶供佛。其福甚多。不如勸人念一聲佛。其福勝彼。

## 雲棲大師勸修淨土

觀佛三昧經。文殊菩薩偈云。願我命終時。滅除諸障礙。面見彌陀佛。往生安樂刹。華嚴行願品。普賢菩薩偈云。願我臨欲命終時。盡除一切諸障礙。面見彼佛阿彌陀。即得往生安樂刹。起信論。馬鳴菩薩云。最勝方便。專意念佛。即得往生。終無有退。楞伽經。佛告大慧。大名德比丘。厥號爲龍樹。得初歡喜地。往生安樂國。以上略舉四大菩薩。其餘菩薩。修淨土者。不可勝紀。廬山遠法師。悟摩訶般若深旨。號東方護法菩薩。而六時念佛。三觀聖像。往生淨土。天台智者大師。妙悟法華。一家教觀。萬代宗祖。而生即面西。辯十種疑。疏十六觀。極談淨土。百丈大師。馬師傳道嫡子。天下叢林共宗。而祈禱病僧。化送亡僧。悉歸淨土。清涼國師。紹華嚴祖位。稱文殊後身。而指示彌陀即盧舍那。亦疏觀經。弘揚淨土。永明壽禪師。得無礙辯才。柱石宗門。而作四料簡。偏贊西方。上品上生。敬及冥府。死心新禪師。繼席黃龍。宗風大振。而切意淨業。著勸念佛文。令人發哀起信。真歇了禪師。嗣丹霞澄公。

雲棲大師勸修淨土

7

徑中徑又徑微義

8

洞下一宗。至師大顯。而卓庵補陀。專意西方。有淨土集行世。慈受深禪師。大悟倩女因緣。一偈融通五教。而謂修行捷徑。無如淨土。建西方道場。苦心勸衆。圓照本禪師。道續天衣。宗弘雪竇。法雷振地。師表兩朝。而淨業兼修。標名上品。中峰本禪師。得法高峰老人。學者仰如山斗。而云禪者淨土之禪。淨土者禪之淨土。有懷淨土詩百首。勸人念佛。以上略舉十大尊宿。其餘尊宿及法師律師。修淨土者。不可勝紀。阿彌陀經。無量壽經。十六觀經。鼓音王經。天親往生論。以上略舉專說淨土經論。其餘經論。帶說淨土者。不可勝紀。道安往生論。懷感臺疑論。慈恩通贊。海東彌陀疏。四明妙宗鈔。慈恩懺願儀。草堂寶王論。孤山刊正記西資鈔。大智觀音疏。優曇蓮宗寶鑑。石資樂邦文類。天如淨土或問。大佑淨土指歸。鏡道二師念佛鏡。道衍善人咏。西齋淨土詩。以上略舉最顯數家。其餘贊揚淨土者。不可勝紀。願一一考其人。閱其言。思其義。斷疑決志。幸甚幸甚。

## 徵義自序

余少業儒。研究孔孟聖賢之道。而於釋氏之書。未之肄及也。庚戌筮仕粵東。亡兒用康。究心內典。購得大藏諸經。闡明心要。余因得而偏讀焉。遂覺此心曠邈。諸相俱空。慨然有出世之意。爰會金剛經宗旨。提要鉤元。名曰金剛經解義。時尚未及淨土也。丙寅歸田後。友人張子簡授余彌陀疏鈔。云是雲棲大師教人修淨土法門也。余受而讀之。仰見我佛如來。救度衆生。超脫生死。惟此念佛一門。最爲簡要。而雲棲大師。指示迷途。詳加引證。實爲往生津梁。因擷其精華。分其節次。名曰彌陀疏鈔擷。余之修淨業自此始。傅大士云。惟有徑路修行。但念阿彌陀佛。雲棲大師云。念佛爲修行徑路。而持名又徑路中之徑路也。吾浙張蘭渚中丞集諸家勸修淨土之說。著徑中徑又徑一編。立信願行三法。又分別十二門。至詳且要。余不揣冒昧。於其中繁者節之。略者增之。再於各條下。申以緒論。徵以故實。復加旁注。以警動衆心。其所以感發信願行之心者。不益切歟。白太傅念佛偈云。日暮而途遠。此生已蹉跎。余今年七

十矣。夕陽雖好。光景無多。惟有謝絕塵緣。皈依佛法。彌陀一卷。佛號千聲。預辦資糧。以爲生後計。是編也。其爲自修自度之左券也夫。

同治七年歲在戊辰四月

樂淨居士 徐槐廷 序

## 徵義張序

淨土法門。自東晉廬山遠公開創。迄今一千五百餘年中。不論僧俗男女。不論貴賤智愚。但信有阿彌陀佛。專心稱念佛名者。無不應願往生。如往生集及淨土聖賢錄等書所載。班班可考。何則。無量壽經四十八願中有云。十方衆生。至心信樂。欲生我國。乃至十念。若不生者。不取正覺。唯除五逆誹謗正法。又偈頌云。我至成佛道。名聲超十方。究竟有不聞。誓不成等覺。然則我在今日。得聞佛名。深願念佛。是即佛在西方。得聞我名。深願念我。惟以佛願感我願。故以我願應佛願。感應道交。至捷至靈。是故信願念佛。終身不變者。早已念念併入彌陀願海中。如水歸壑。決定往生。或者疑而問曰。我但晨昏念佛。日間浩浩。俱屬塵勞。且口念佛時。不免雜念起滅。恍惚無定。欲求一心不亂甚難。未識亦能往生否。答曰。切勿多疑。亦無論一心散心。特患信行願三者發心不真耳。果發真心。此心如長江水。種種雜念。如水上波。往生如江流入海。豈有江流入海時。波不消散而反能阻礙長流乎。又一人問曰。若

徵義張序

1 1

徑中徑又徑徵義

1 2

然。儘可作惡。但肯念佛。亦得往生。則西方將成逋逃藪。奈何。曰。嘻。爾不作惡。尚不肯念佛。而謂作惡者。反肯念佛乎。且人惟不信佛。故敢作諸惡。未有真實信佛。而不知爲善去惡者。如子所疑。是名誹謗正法。佛不能救。蘭渚張中丞。知世俗種種疑障。可憐可憫。所以有徑中徑又徑之作。吾邑樂淨徐居士。宰粵東時。嘗著金剛經解義。刊印廣施。歸田後。斗室清修。與常惺訂忘年交。專談佛法。篤修淨業。以張中丞所著。最足啓發信根。嘗手鈔數過。爲之條增徵義。而以一冊贈惺。珍藏垂三十年。茲遇靜涵陸居士初發心念佛。願力精進。出眎此冊。欽慕其誠。亦手錄一過。願付棗梨。以廣流通。夫靜涵之願。即張中丞徐居士之願。亦即阿彌陀佛之大願光明。所照所感。故凡讀此冊而能發一念信心。發一念願心。發一念念佛真心。阿彌陀佛。即在爾一念心中。垂手接引。他日蓮池會上。把臂同行。幸勿錯過機緣也。時在光緒二十五年己亥元宵淨業學人海鹽張常惺謹敘於吳門寓齋。時年六十有六。

# 徑中徑又徑微義卷上

清歸安張師誠輯 海鹽徐槐廷徵義

## 起信法

### 醒迷門

浮生若夢。一切皆空。人皆知之。亦能言之。而終日營求靡已。曾不醒悟。大率以死後即化。又或以爲死即復生。不足爲慮。詎知孽報無爽。得人身極難。即得人身。而依然又入夢境。輪迴六道。其苦無涯。欲脫離此苦。舍淨土奚歸耶。將起其信。先破其迷。

### 輯醒迷門

宋王龍舒淨土文曰。人生時父母妻子屋宅田園。以及器皿衣服等物。無非受著。倉庫既盈。心猶未足。金帛已多。營猶未止。一旦大限到來。盡皆拋去。雖我有此身。猶是棄物。況身外者乎。靜心思之。恍如一夢。古人云。一日無

起信法 醒迷門

13

徑中徑又徑微義(卷上)

14

常到。方知夢裏人。萬般將不去。唯有業隨身。妙哉此言。予添作一偈云。萬般將不去。唯有業隨身。但念阿彌陀。定生極樂國。

昔韓持國堦王實訪東坡。言持國自謂癯老。且將聲樂酒色以娛年。東坡曰。惟其殘年。正不當爾。頃有一老人。生死之際。極爲了然。一日置酒會親友。酒闌語衆。奄奄欲去。諸子呼號。願留一言爲教。老人曰。只宜第一五更起。諸子未喻。老人曰。唯五更可勾當自家事。自家事者。是死時將得去者。且吾平日治生。今日就化。可將何者去。諸子頓悟。請君言于持國。勾當自家事。與其勞心聲色。不若爲死時將得去者計也。

又曰。此世界中人。皆如水上泡。生滅不常。只見眼前老者。不思不待老而去者多矣。況世間無非是苦。即或稱意。亦無多時。平時罪惡。豈得全無。閉眼之後。不免隨業緣去。杳杳冥冥。知在何處。或墮地獄。受諸極苦。或爲畜生。受人宰殺。或生餓鬼。饑火燒身。或入脩羅。瞋恨所迫。雖有善業。得生天上人間。受盡福報。依舊輪回。漂流汨沒。無有出期。唯有西方淨土。最爲超脫輪回之捷徑。色身難得。趁此康健時。辦此大事。命終徑生極樂世界。

回視死入陰府。見閻王受恐怖者不同矣。

道徹。錢塘人。乾隆間將示寂。謂其衆曰。娑婆之苦。不可說。不可說。極樂之樂。不可說。不可說。倘蒙記憶。但念阿彌陀佛。不久當相見。錯過此生。輪轉長夜。痛哉痛哉。

死心和尚淨土文曰。彌陀甚易念。淨土甚易生。而世人不肯信向。但只貪生。不知有死。人生百歲。七十者稀。大限到來。還他一死。只如功名富貴人家。財寶如山。妻妾滿室。日夜歡樂。他豈不要長生在世。爭奈前程有限。暗裏相催。符到便行。不容遲滯。且據諸人眼裏親見。耳裏親聞。前街後巷。親情眷屬。朋友兄弟。強壯後生。死卻多少了也。古云。莫待老來方學道。孤墳盡是少年人。我勸少年人。趁此血氣剛盛。色力未衰。正好修行。奉勸衰老人。最好念佛。年紀朽邁。日月無多。髮白面皺。眼暗耳聾。頭低背曲。腳手顫掉。去天甚遠。入地甚近。不辦死路。又待何時。有兒女人。正好念佛。自從早年娶妻養子。經營家計。受盡千辛萬苦。今日兒女長大。家計已成。好將擔子分付兒孫。落得現成享福。念佛修行。若不回頭。定是癡人。忽然三寸氣斷。不

免一旦皆休。若是孝順兒孫。齋得幾衆僧。看得幾部經。哭得幾聲。猶是記憶爺娘。若是不肖之子。父母方死。骨頭未冷。作耗財產。出賣田園。恣意作樂。以此觀之。著甚麼急。兒孫自有兒孫福。莫爲兒孫作遠憂。無男女人。正好念佛。孤單一身。無憂無慮。不須男婚。不愁女嫁。粗衣淡飯。多少清閒。若不修行。後悔何及。富貴人最好念佛。高堂大廈。衣食豐足。百事現成。皆是前世修來。貧窮人正好念佛。衣食不足。貧窮下賤。常受饑寒。只因前世不肯修行。遂遭現報。若不改往修來。一死之後。如秤鎚落井。何時得出。參禪人正好念佛。或根機稍鈍。恐今生未能大悟。且假彌陀願力。接引往生。如受蔭官。不憂落第。爵祿現成。有等愚人說道。心好便了。何須念佛。此等邪見。惑亂世人。古德云。冷笑富家翁。營生忙似箭。囤裏米生蟲。庫中錢爛貫。日裏把秤稱。夜間點燈算。形骸如傀儡。莫教繩索斷。眼光忽落地。追悔有何便。汝若念佛不生淨土。我墮拔舌地獄。他年淨土花開日。記得娑婆念佛時。

明蓮池大師曰。世尊說人命在呼吸間。當愀然不樂。痛相警策道。大眾。我與你但今日送某僧。明日送某僧。不知不覺。輪到自身。此時悔恨無及。須



疾忙念佛。時刻不要放過方好。我見你們自家也說可惜。對人也說可惜。及乎堂中佔唱。依然談笑自如。你只不信人命在呼吸間也。

蓮池大師骷髏圖說一篇曰。傳大士云。漸漸雞皮鶴髮。看看行步龍鍾。假饒金玉滿堂。難免生老病死。任汝千般快樂。無常終是到來。惟有徑路修行。但念阿彌陀佛。大士此語。正所謂萬般將不去。惟有業隨身是也。如何是萬般將不去。人生所有官爵金寶。屋宅田園。飲食衣服玩好。乃至嬌妻愛子。無常到來。那一件是將得去者。如何是惟有業隨身。人生所造諸貪瞋癡業。非禮姦姪。恣意宰殺。爲子逆父。爲臣欺君。剋衆成家。陰毒害物。種種惡業。無常到來。只是緊緊隨著你者。既然如是。若不猛省回頭。改惡從善。洗心念佛。豈非徒得人身。虛生浪死。苦哉苦哉。我觀世人。箇箇皆好念佛。今以三等列之。一者極閒人。應當無晝無夜。一心念佛。二者半閒半忙人。應當營事已畢。即便念佛。三者極忙人。應當忙裏偷閒。十念念佛。又富貴之人。衣祿豐足。正好念佛。貧窮之人。安貧守分。正好念佛。有子孫人。得人替力。正好念佛。無子孫人。心無牽掛。正好念佛。無病之人。身力康健。正好念佛。有病之人。

知死不久。正好念佛。聰明之人。通經達理。正好念佛。愚鈍之人。無雜知見。正好念佛。以要言之。天上人間。四生九有。皆當念佛。奉勸世人。何不趁此四大未作骷髏時。早早念佛。直待萬般將不去。惟有業隨身。懊悔無及了也。

明邵武知府嚴澂。遭親故書曰。澂一病幾殆。不意復生。雖則苟延。焉知來日。回首營生舊計。有同嚼蠟。一具皮囊。終歸敗壞。六塵緣影。何處堅牢。不如換卻凡心。求生淨土。誦彌陀一句。消罪業無邊。聊奉勸文。用表誠意。

宋師子峰如如顏丙勸修淨業文曰。只這色身。誰信身爲苦本。盡貪世樂。不知樂是苦因。浮生易度。豈是久居。幻質非堅。總歸磨滅。自未入胞胎之日。奚有這男女之形。只緣地水火風假合而成。不免生老病死彫殘之苦。虛浮如水上泡。須臾不久。危脆似草頭露。倏忽便無。長年者不過六七十以皆亡。短命者大都三二十而早夭。況乎獸殘蟲螫。猝不及防。屋壓車傷。痛何能救。坑坎邱陵之厄。到處堪虞。刀兵水火之災。何時蔑有。又有今日不知明日事。上牀別了。下牀鞋。幾多一息不來。便覺千秋永別。歎此身無有是處。奈誰人不被他瞞。筋纏七尺骨頭。皮裹一包肉塊。九孔常流不淨。六根恣逞無明。髮毛爪齒。

聚若堆塵。涕淚唾津。污如行廁。裏面盡蛆蟲聚會。外頭招蚊虱交攢。沾一災一疾。皆死得人。更大熱大寒。催人易老。眼被色牽歸餓鬼。耳隨聲去入阿鼻。口頭喫盡味千般。死後只添油幾滴。此身無可愛惜。諸人當願出離。如何迷昧底尙逞風流。懵懂漢猶生顛倒。或有骷髏上頭。簪花簪草。或有臭皮袋畔。帶麝帶香。羅衣罩了膿血囊。錦被遮卻屎尿桶。用盡奸心百計。將謂住世萬年。不知頭痛眼花。閻羅王接人來到。那更鬢斑齒損。無常鬼寄信相尋。箇箇戀色貪財。盡是失人身捷徑。日日飲酒食肉。無非種地獄深根。眼前圖快活一時。身後受苦辛萬劫。一旦命根絕處。四大風刀割時。外則腳手牽抽。內則肝腸痛裂。縱使妻兒相惜。無計留君。假饒骨肉滿前。有誰替汝。生者空自悲啼痛切。死者不免神識奔馳。前途不見光明。舉眼全無伴侶。過奈河岸。見之無不悲傷。入鬼門關。到者盡皆悽慘。世上纔經七日。陰間押見十王。曹官抱案沒人情。獄卒持叉無笑面。平生作善者。送歸天道。仙道。人道。在日造惡者。押入湯塗。火塗。刀塗。鑊湯沸若山頭。劍樹勢如峰聳。灌銅汁而徧身肉爛。吞鐵丸而滿口煙生。遭剉磕則血肉淋漓。入寒冰則皮膚凍裂。身碎業風吹再活。命終

羅剎喝重生。人間歷盡幾春秋。獄內方爲一晝夜。魂魄雖歸鬼界。身屍猶臥棺中。或隔三朝五朝。或當六月七月。腐爛則出蟲出血。臭穢則薰地薰天。胖脹不堪觀。醜惡真可怕。催促付一堆野火。斷送埋萬里荒山。昔時耍俏紅顏。翻成灰燼。今日荒涼白骨。變作泥堆。從前恩愛。到此成空。自昔英雄。如今何在。淚雨灑時空寂寂。悲風動處冷颼颼。夜闌而鬼哭神號。歲久而鷄餐雀啄。荒草畔漫留碑石。綠楊中空掛紙錢。下梢頭難免如斯。到這裏怎生不醒。大家具眼。及早回頭。翻身跳出迷津。彈指裂開愛網。休向鬼窟裏作活計。要知蒲團上有真人。我佛悲憐。用垂拯救。欲令橫超三界。特開淨土一門。四十八願之宏深。入人心而徧加攝受。十萬億程之遙遠。仗佛力而不隔須臾。託質蓮胎。享自然之衣食。棲神淨域。免他道之輪迴。是男是女總堪修。若智若愚皆有分。但請回光返照。便知本體原無。若未能學道參禪。也且是持齋念佛。果能一心不亂。管教七日成功。移六賊爲六神通。離八苦爲八自在。淨土文。法言可證。往生傳。靈蹟非虛。對衆爲大眾宣揚。歸家爲一家解說。使處處齊知覺悟。教人人盡免沉淪。上助諸佛轉法輪。下拔衆生離苦海。佛言不信。何言可信。人

道不修。他道難修。莫教一日換了皮。縱有千佛難救汝。火急進步。時不待人。各且直下承當。莫使此生空過。

明莊嚴。深達佛理。衣食所餘。悉以施人。常調滿庭芳一闋云。六十餘年。片時春夢。覺來剛熟黃梁。浮華幻影。有甚好風光。冷眼輕輕覷破。急翻身蹬斷絲韁。兒孫戲。從他搬演。何必看終場。青山茅一把。殘生活計。別作商量。但隨緣消遣。洗鉢焚香。先送心歸極樂。恣逍遙。寶樹清涼。堪悲也。回頭望處。業海正茫茫。

淨土晨鐘載錢孝直曰。從來三界生死輪回。比於牢獄。然則但未出生死。皆三界獄中囚也。今見縲紲之中。呼天乞命。莫不哀其愚。而嘆其求生之不早。吾謂死囚求生太晚。比之我輩。猶爲早計也。死囚秋決。歲不過一日。一日前後。皆日日爲之打點。我輩在三界獄中。月月可死。日日可死。不論貴賤老少。好人惡人。皆可以死。不早打點。姑待一刻。萬一即此一刻。駕帖到來。劊手當面。手忙腳亂。何以禦之。又袁中郎曰。衆生處五濁世。如囚處獄。以入獄皆罪人。處人天者。皆是業報分段之身故也。然罪人入獄。時刻求出。以知棘

牆之外。更有許大安樂世界故也。今衆生以煩惱爲家宅。以生死爲園囿。不知大鐵圍山。是我棘牆。三界法場之外。各自有家鄉樂地。諸佛憫此。爲分別淨穢。指以脫歸路程。又大建宅舍以安之。分明往來獄門。爲治道塗。長伺獄外。修飾旅館。如是之恩。何身可報。經云。如來爲一大事。出現於世。大事者。生死事也。諸佛既不惜垂手。衆生乃死而不悟。哀哉。

昔一僧探俗友。勸以生死事大。急宜念佛。友謝。以三頭未了。僧問故。友曰。親柩未葬。男婚女嫁未畢。僧別不久。友忽亡。僧往弔。作詩曰。吾友名爲張祖留。勸伊念佛說三頭。可憐閻老無分曉。未了三頭便去勾。此言雖淺。大可醒俗。

又曰。自貧賤而視富貴。見其氣燄薰灼。不勝垂涎。然當之者。未必真樂也。如一人喜怒不測。憂在事主。同列人懷異志。憂在羣情。因貪位而患得患失。緣事權而伐異黨同。位愈高則責愈重。寵愈隆則忌愈衆。事機一失。至求爲匹夫不可得。富家翁持籌會計。竭一生心力以遺子孫。而百年興廢。事難逆料。身後所有。率歸他人。由是言之。富貴亦有何榮。純是苦耳。蓋富貴勝貧

賤者。皆無緊要事。如食以遏饑。衣以禦寒。若衣而華。食而精。此於身心。有何緊要。其他可知。至大利害處。老也。病也。死也。止此隻身。獨當一面之孤注。到鐘鳴漏盡光景。卿相以至氓庶。總無人可代。總同一結煞。思及此。不由人不當下心灰也。

明天啓初。北京正陽門。有老軍看守。鰥居無子。胸中無一事。日焚香誦金剛經。首相韓爌。每乘大轎。腰玉衣蟒。呼殿過其地。聞聲輒歎曰。爲我難。爲彼易。而我無彼福也。老軍七十二而終。六月屍無穢氣。飛蠅不集。人皆異之。冒起宗曰。人生不受圭組羅籠。身得自由。眼前無累。便是人間仙福。更修最上乘出世正因。豈火宅中大富貴可得比乎。

## 易行門

已識迷途。欲求出世。當知入道多門。惟念佛往生淨土爲易行。淨土多方。又惟往生西方極樂世界之淨土。尤爲易行。蓋阿彌陀佛有四十八大願。度盡衆生。與此世界之緣偏重。威力又極大。故攝取無遺。人能信向。至心持名。未有不蒙接引。所謂仗他之法。與專恃自力者。難易迥殊也。

## 輯易行門

龍舒淨土文曰。淨土傳云。阿彌陀佛與觀世音勢至二菩薩。乘大願船。泛生死海。就此娑婆世界。呼引衆生上大願船。送至西方。如肯往者。無不得生也。觀此則是佛與菩薩。憫念衆生。沉淪苦海。無有得出。故自以誓願威力。招誘人生淨土。如舟人招誘行人登舟。送至彼岸也。人唯恐不信耳。若信心肯往。雖有罪惡。亦無不得生。蓋信者。一念也。若人在生時。心念要去。身則隨去。心念欲住。身則隨住。是身常隨念。然猶有念欲去。而身被牽繫者。身壞時。唯一念而已。一念到處。則無不到。是以一念在淨土。則必生淨土。況

佛與菩薩。又招引人往生乎。

往生傳。張抗爲翰林學士。課大悲咒十萬遍。願生西方。一日寢疾。唯念佛號。忽謂家人曰。西方淨土。祇在堂屋西邊。阿彌陀佛坐蓮華上。翁兒在花地金沙上。禮拜嬉戲。良久。念佛而化。翁兒抗之孫。已先逝也。蓋極樂世界。乃吾心之土耳。約里有十萬億。心則原無遠近。故楞嚴經云。臨命終時。未捨煖觸。一生善惡。當時頓現。純想即飛。必生天上。若兼福兼慧。及與淨願。自然心開。見十方佛。一切淨土。隨願往生。

宋丞相鄭清之曰。今之學佛者。不過禪教律。究竟圓頓莫如禪。非利根上器。神領意解者。未免蹈頑空之失。研究三乘莫如教。非得魚忘筌。因指見月者。未免鑽故紙之誚。護善遮惡莫如律。非身心清淨。表裏如一者。未免自纏縛之苦。總而觀之。論其所入。則禪教律。要其所歸。則戒定慧。不由禪教律。而得戒定慧者。其唯淨土之一門乎。方念佛時。口誦心維。諸惡莫作。豈非戒。繫念淨境。幻塵俱滅。豈非定。念實無念。心華湛然。豈非慧。人所屏除萬慮。一意西方。則不施棒喝。而悟圓頓機。不閱大藏經。而得正法眼。不持四威儀

中。而得大自在。不垢不淨。無纏無脫。當是時也。孰爲戒定慧。孰爲禪教律。我心佛心。一無差別。此修淨土之極致也。八功德水。金蓮花臺。又何必疑哉。

蓮池大師曰。大藏經所詮者。不過戒定慧而已。念佛即是戒定慧。何必隨文逐字。閱此藏經。光陰迅速。命不堅久。願諸人以淨業爲急務。

蓮池大師曰。徑路修行者。路小而捷名徑。小喻念佛爲力之簡易。捷喻念佛成功之迅速。善導大師偈云。唯有徑路修行。但念阿彌陀佛是也。故云。餘門學道。名豎出三界。念佛往生。名橫出三界。如蟲在竹。豎則歷節難通。橫則一時透脫。餘門之比念佛。則念佛爲速矣。念佛復有多門者。如實相念佛四種。乃至萬行回向等。實相之佛。雖云本具。而衆生障重。解悟者希。下此數門。觀像則像去還無。因成間斷。觀想則心麤境細。妙觀難成。萬行則所作繁多。重處偏墜。唯此持名一法。簡要直捷。但能繼念。使得往生。古人謂既得見彌陀。何愁不開悟。則不期實相而實相契焉。故念佛爲修行徑路。而持名又念佛中之徑路也。

桐江法師云。成佛有橫豎二出。豎出者聲聞修四諦。緣覺修十二因緣。菩

薩修六度萬行。此涉境位。譬如及第。須有才學。又如歷任轉官。須有功效。橫出者。念佛求生淨土。譬如蔭敘。功由祖父他力。不問學業有無。又如覃恩普轉。功繇國王。不論歷任深淺。其難易有迥殊矣。

蓮宗寶鑑云。娑婆濁境。衆苦集而求道難成。淨土樂邦。諸善聚而位登不退。稱名號者。諸佛護念而往生。發菩提者。彌陀光照而增進。菩薩羅漢。與其同儔。水鳥樹林。悉皆念佛。耳畔常聞妙法。心中頓絕貪瞋。快樂無窮。壽量何極。一生彼土。更不退轉。豈比人天道中。觸目多諸違順。權乘路上。善根希有周圓。所以三乘之士。歷阿僧劫而功行難成。念佛之門。於彈指頃而往生安養。初學機淺。非他力難以進修。我佛願深。但有緣悉皆攝受。餘門學道。如蟻子上於高山。淨土往生。似風帆行於順水。彌陀接引。直趣菩提。衆聖提攜。高超三界。上品即登佛果。下生猶勝天宮。普信不疑。同修不退。

雲棲事略。鄰有老嫗。日課佛名數千。問其故。嫗曰。先夫持佛名。臨終無病。與人一拱而別。故知念佛功德。不可思議。師自此棲心淨土。書生死事大於案頭以自策。

西方公據云。諸善人。世間有千條萬條路。如何只勸人念佛。人之念頭。所繫甚重。牽魂引魄。造命生身。莫不由此。念善上天堂。念惡下地獄。一念直爲人。一念橫爲畜。如何是餓鬼。只因念不足。念魔還成魔。念佛便成佛。若要免六道。除非只念佛。若還不念佛。一失下人身。萬劫難再得。所以釋迦如來。教人念佛。遠公法師。教人念佛。念佛不能了生死。佛祖如何肯誤人。念佛不成佛。其過不在佛。口念心不念。雖念如未念。饒你一生。也不當一聲。念字從心。原不從口。而念一生心。聲隨口出。心佛口佛。兩不可廢。千佛萬佛。如何只念阿彌陀佛。以其原有四十八願。誓度盡十方衆生。其中有曰。若十方世界一切衆生。能稱我阿彌陀佛名號。而不生我國者。誓不成佛。其土具載阿彌陀經。是名西方極樂世界。嗚呼。人間富貴。百歲成空。天上繁華。千年則止。一入西方極樂世界。便有無量之壽。而其往生之法。又只憑一句彌陀。世間有這樣極便宜好事。卻不肯幹。又到那裏著鐵鞋而問至道。而今而後。急須發下誓願。若某不念佛。不求生西方極樂世界。則爲鬼而永墮北陰酆都地獄。已而已而。三藏十二部。讓與別人悟。八萬四千門。饒與別人行。一句南無阿

彌陀佛之外。不用一字。各自去掃淨室一間。供佛像一尊。每日燒清香一爐。換淨水一碗。夜來上明燈一盞。紙畫木雕。即同真佛。早晚朝參。必誠必敬。一串數珠不離手。一句彌陀不離口。高聲念。低聲念。六字念。四字念。緊念。緩念。朗念。默念。合手念。跪膝念。面佛念。朝西念。敲魚念。掐珠念。行道念。禮拜念。獨自念。同衆念。在家念。在外念。閒也念。忙也念。行也念。住也念。坐也念。臥也念。連夢中也念。纔是真念。念得心酸淚下。念得火滅灰寒。念得神號鬼哭。念得天喜地歡。鑊湯在後。蓮池在前。雖千萬人阻我不念。不可得也。

善導和尚立專雜二修。雜修者。謂散漫修諸善業。回向莊嚴。專修者。身須專禮阿彌陀佛。不雜餘禮。口須專稱阿彌陀佛。不稱餘號。不誦餘經咒。意須專想阿彌陀佛。不修餘觀。專修者。百即百生。千即千生。若雜修者。百中或得一二人生。千中或得三五人生。

漢月禪師曰。求生淨土。法門最廣。單取緊峭無滲漏爲上。故持經次於持咒。持咒次於作觀。作觀次於持名。持六字不如持四字。蓋於持名減省。易於

成功故也。然持名之法。撥珠課誦。又涉泛濫。雖念而寬。不得成就。須是極力。四字佛名。一句追一句。一聲頂一聲。若一日乃至七日。念至虛空粉碎。五蘊冰消。謂之一心不亂。此便是淨業已成。往生有日矣。

雲棲法彙。問。經文只云執持名號。似只四字。今盡從六字。畢竟何者爲是。大師自用何法。答。四字自念。六字從衆。

## 析疑門

人聞易行之說。往往疑而不修。即修行已久者。亦有中道游移。疑情日起。或墮前功。或趨外道。因疑而誤。流弊無窮。夫往生淨土。原非即能成佛。所恃者。常不離佛。永無退轉。必能成佛而後已。爲把穩生涯耳。智者十疑論。天如或問。雲棲四十八問答。不憚往復辯論。至明至切。此門惟採昔賢問難難說著於篇。以斷其疑。

## 輯析疑門

慧覺玉禪師曰。或謂淨土乃聖人之權方。所以接鈍根。化凡器也。苟能一超直入如來地。何藉於他力乎。答曰。佛世文殊普賢。滅後馬鳴龍樹。此土智者智覺。皆發願往生。應盡是鈍根乎。釋迦於大寶積經。勸父王淨飯。並七萬釋種。皆生淨土。應盡是凡器乎。此等聖賢。應皆不逮今之利根勝器乎。況以此爲權。將何爲實。昔孫莘老亦疑於此。因會楊次公王敏中辯論。遂息此疑焉。

按普賢偈云。願我臨欲命終時。盡除一切諸障礙。面見彼佛阿彌陀。即得

起信法 析疑門

31

徑中徑又徑微義(卷上)

32

往生安樂刹。文殊偈亦如是。馬鳴尊者著起信論。末後勸人求生淨土。龍樹尊者造毘婆沙論。有稱讚彌陀偈。寶積經云。佛言。父王。今當念西方世界阿彌陀佛。常勤精進。當得佛道。爾時父王與七萬釋種。聞說是法。信解歡喜。悟無生忍。

王龍舒曰。或者疑之云。人世念佛。西方七寶池中。如何便生蓮花一朵。予告云。此不難知。譬如大明鏡。凡有物來。便現其影。鏡何嘗容心哉。以其明而自然耳。阿彌陀佛國中。清淨明潔。自然照見十方世界。猶如明鏡。覩其面像。是故此間念佛。西方七寶池。自然生蓮花一朵。無足疑也。或者又疑之云。念往生真言者。阿彌陀佛。常住其頂。衛護其人。若無量世界。有無量衆生。念此真言。阿彌陀佛。豈能一一徧住其頂乎。曰。亦自然耳。譬如天上一月。普現一切水中。豈不自然哉。或者又疑之云。有臨終之時。佛與菩薩來迎。且如十方世界。有無量衆生精進。烏能皆知其期而往迎乎。曰。亦自然耳。譬如天上一日。普照無量境界。豈不自然哉。況佛之威神。不止如日月乎。則徧住其頂。徧知其期。何足疑哉。



淨土決疑序云。阿彌陀佛光明。如大圓月。遍照十方。水清而靜。則月現全體。月非趨水而遽來。水濁而動。則月無定光。月非捨水而遽去。在水則有清濁動靜。在月則無趨捨去來。故優曇云。化體即真。說無去來。從真流化。現有往還。不來而來。似水月之頓呈。不見而見。猶行雲之忽現。

王龍舒曰。人驟聞淨土之景象。多不信之。無足怪也。蓋拘於目前所見。遂謂目前所不見者。亦如是而已。不知佛切戒人以妄語。必不自妄語以誑人。世人妄語者。非以規利。即以避害。佛無求於世。何規利之有。佛視死生如刀斫虛空。何避害之有。是佛無所用其妄語也。世間中人以上者。猶不肯妄語以喪其行止。況佛乎。其言可信。無足疑者。況自古迄今修此者。感應甚多。尤不可不信也。

李卓吾曰。當時釋迦牟尼金口稱讚。有阿彌陀佛在西方極樂國土。專一接引念佛衆生。以此觀之。是爲有國土乎。無國土乎。若無國土。則阿彌陀佛爲假名。蓮華爲假相。接引爲假說。互相欺誑。佛當受彌天大罪。當即時敗露。安能引萬億劫聰明豪傑。並僧俗男女。同生信向乎。何以問我有無形相國土爲

也。

王龍舒曰。或云。人誦佛名。一向稱誦。正如呼一人。一向呼之。其人必怒。故一向誦佛名者。未足爲善也。答曰。是不然。衆人自無始以來。口業過惡。積如山海。多誦佛名以滌蕩之。猶懼不足。豈可以稱呼常人之名爲比也。況諸佛自開此念誦法門。所以誘掖衆生善其口業。以漸善其身意。故謂一向誦佛名。未足爲善者。此世俗之言。非諸佛誘掖衆生之言也。

先生謂予嘗於鎮江聞賣蝦者。叫蝦一聲。而知其三業俱惡。何則。身荷蝦擔。則身業惡。意欲賣蝦。則意業惡。口叫賣蝦。則口業惡。三業俱惡。此佛所謂地獄人也。若口念佛名。則口業善。口念佛時。又能心想佛像。則意業善。端正其身。而手提數珠。則身業善。常能善此三業。以修淨土。必上品生。

蓮池大師云。有謂唯心淨土。無復十萬億刹外。更有極樂淨土。此唯心之說。原出經語。真實非謬。但引而據之者。錯會其旨。夫即心即境。終無心外之境。即境即心。亦無境外之心。既境全是心。何須定執心而斥境。撥境言心。未爲達心者矣。或又曰。臨終所見淨土。皆是自心。故無淨土。不思古今念佛

往生者。其臨終聖衆來迎。與天樂異香幢幡樓閣等。惟彼一人獨見。可云自心。而一時大衆。悉皆見之。有聞天樂隱隱向西而去者。有異香在室。多日不散者。夫天樂不向他方。而西向以去。彼人已故。此香猶在。是猶得謂無淨土乎。圓照本禪師。人見其標名蓮品。豈得他人之心。作圓照之心乎。又試問汝臨終地獄相現者非心乎。曰。心也。其人墮地獄乎。曰。墮也。夫既墮地獄。則地獄之有明矣。淨土獨無乎。心現地獄者。墮實有之地獄。心現淨土者。不生實有之淨土乎。

宋圓照本禪師。居慧林。平時密修淨業。時雷峰才法師。神遊淨土。見一殿殊麗。問之。曰待淨慈本禪師耳。又資福曦公至慧林。公禮足施金而去。人詰其故。曰。吾定中見金蓮華。人言以俟慧林本公。其他蓮華無數。云以待受度者。或有萎者。云是退墮人也。後臨終安坐而逝。

天如淨土或問曰。人都道淨業只是身後事。於今目前。無所利濟。答曰。汝之所見未廣也。豈不見經中道。受持佛名者。現世當獲十種勝利。一者。常得一切諸天神。隱形守護。二者。常得一切菩薩。常隨守護。三者。常得諸佛

晝夜護念。阿彌陀佛。常放光明。攝受此人。四者。一切惡鬼。皆不能害。一切蛇龍毒藥。悉不能中。五者。水火冤賊。刀箭牢獄。橫死枉生。悉皆不受。六者。先所作業。悉皆消滅。所殺冤命。彼蒙解脫。更無執對。七者。夜夢正直。或夢見阿彌陀佛勝妙色像。八者。心常歡喜。所作吉利。九者。常爲一切世間人民。恭敬歡喜禮拜。十者。命終之時。心無怖畏。正念現前。得見阿彌陀佛及諸聖衆持金蓮華。接引往生西方淨土。如上十種利益。經文具載。乃佛口之所宣也。既是現生來世。皆有利益。然則世出世間要緊法門。無如念佛者矣。但當精進。勿用懷疑。

龍舒淨土文。敘現世念佛感應一卷。有念佛卻鬼。如陳企者。有念佛脫難。如邵希文者。有念佛安寢。如劉仲慧者。有念佛屋不壓死。如瞽婦者。有念佛店疾遂愈。如李子清者。有念佛眼明。如阮嫂者。有念佛痼疾皆愈。如梁氏女者。有念佛治病得愈。如秀州僧者。有念佛孫兒免難。如鄉老者。有見殺生念佛得福。如鄭鄰者。由此推之。念佛勝利。豈但十種而已哉。

慈照宗主淨土十門告誡云。念佛人臨終三疑。不生淨土。一者。疑我生來

作業極重。修行日淺。恐不得生。二者。疑我雖念彌陀。或有心願未了。及貪瞋癡愛未息。恐不得生。三者。疑我雖念彌陀。臨命終時。恐佛不來迎接。有此三疑。因疑成障。失其正念。不得往生。故念佛之人。切要諦信佛經明旨。勿生疑心。經云。念阿彌陀佛一聲。滅八十億劫生死重罪。上至一心不亂。下至十念成功。接向九蓮。令辭五濁。苟能心心不昧。念念無差。則疑情永斷。決定往生矣。

無爲楊次公曰。火車可滅。舟石不沉。現殺報者。莫甚於張馮。十念而超勝處。入地獄者。莫速於雄俊。再甦而證妙因。世人愆尤。未必若此。謂不能生者。何自棄哉。

陳瓚。明進士。一意淨業。客曰。爾不聞大鑒之論唯心乎。何厭垢而欣淨爲。答曰。唯心淨土。發之大鑒。而非自大鑒始也。是心作佛。是心是佛。佛固先言之矣。蓋懼人以不淨之心求淨土也。非曰土無垢淨也。且樂邦之可樂也。不獨華池珠閣。鳥音風樹云爾也。吾幸與羣聖人遊。被無量光。經無數佛。證無生忍。成無上道。濟無邊衆。誠樂矣。客以客之禪樂垢土。我以我之禪樂淨

土。客無庸呵我矣。

瓚。萬曆中累官刑部侍郎。臥疾誦佛益虔。故事。京師大臣三品以上。暑月賜冰。既置冰於榻前。衆見冰中湧出七級浮屠。欄楯鉤綴。璽格玲瓏。移時冰漸消。塔影漸瘦。頃之氣絕而影沒矣。

# 徑中徑又徑微義卷中

清歸安張師誠輯 海鹽徐槐廷徵義

## 立願法

### 決定門

信而無願。信即虛浮。即有願矣。或以此生已晚。功效難期。惟求來世爲人。出家修行。此意非不甚善。殊不思今世所造之業。能必來世爲人乎。能必爲人仍知佛法乎。一蹉百蹉。悔之無及。必須拼此一生。咬定牙根。非往極樂國土不可。非此生即往不可。如此發願。方可謂之決定。願既堅決。功自精進。有志竟成。豈虛語哉。

### 輯決定門

五代永明延壽禪師曰。九品經文。自有升降。上下該攝。不出二心。一定心。如修習定觀。上品往生。二專心。但念名號。衆善資薰。回向發願。得成

立願法 決定門

39

徑中徑又徑微義(卷中)

40

末品。仍須一生皈命。盡報精修。坐臥之間。面常西向。當行道禮敬之際。念佛發願之時。懇苦翹誠。無諸異念。如就刑獄。若在狴牢。怨賊所追。水火所逼。一心求救。願脫苦輪。速證無生。廣度含識。紹隆三寶。誓報四恩。如斯至誠。必不虛棄。如或言行不稱。信力輕微。無念念相續之心。有數數間斷之意。似此懈怠。臨終望生。但爲業障所牽。恐難值其善友。風火逼迫。正念不成。何以故。而今是因。臨終是果。應須因實。果則不虛。聲和則響順。形直則影端也。

藕益大師曰。九品謂深信切願念佛。而念佛時心多散亂者。即是下品下生。深信切願念佛。而念佛時散亂漸少者。即是下品中生。深信切願念佛。而念佛時便不散亂者。即是下品上生。念到事一心不亂。不起貪瞋癡者。即是中三品生。念到事一心不亂。任運先斷見思塵沙。亦能伏斷無明者。即是上三品生。總不外乎定專二心。

元優曇大師曰。眞信修行之事。端的是要生極樂世界。專意一念。持一句阿彌陀佛。只此一念。是我本師。只此一念。即是化佛。只此一念。是破地獄

之猛將。只此一念。是斬羣邪之寶劍。只此一念。是開黑暗之明燈。只此一念。是渡苦海之大船。只此一念。是醫生死之良方。只此一念。是出三界之徑路。只此一念。是本性彌陀。只此一念。達唯心淨土。但只要記得這一句阿彌陀佛在念。莫教失落。念念常現前。念念不離心。無事也如是念。有事也如是念。安樂也如是念。病苦也如是念。生也如是念。死也如是念。如是一念分明不昧。又何必問人覓歸程乎。

蘇東坡曰。佛以大圓覺。充滿河沙界。我以顛倒想。出沒生死中。云何以一念。得往生淨土。我造無始業。本從一念生。既從一念生。還從一念滅。生滅盡處。則我與佛同。如投水海中。如風中鼓囊。雖有大聖智。亦不能分別。

又曰。凡修淨土之人。灼然自要敵他生死。不是說了便休。當念無常迅速。時不待人。須是把做一件事始得。若也半進半退。似信似疑。到了濟得甚麼邊事。如何出離輪迴。若是信得及。便從今日去。發大勇猛。發大精進。莫問會與不會。見性不見性。但只執持一句南無阿彌陀佛。如靠著一座須彌山相似。搖撼不動。專其心。一其意。或參念觀念。憶念。十念。或默念專念。繫念。

立願法 決定阿

41

徑中徑又徑微義(卷中)

42

禮念。念念在茲。常憶常念。朝也念。暮也念。行也念。坐也念。心念不空過。念佛不離心。日日時時。不要放捨。緜緜密密。如雞抱卵。常教暖氣相接。即是淨念相繼。更加智照。則知淨土即是自心。此乃上智人修進工夫。如此把得定。做得主。靠得穩。縱遇苦樂逆順境界現前。只是念阿彌陀佛。無一念變異心。無一念退惰心。無一念雜想心。直至盡生。永無別心。決定要生西方極樂世界。果能如是用功。則歷劫無明生死業障。自然消殞。塵勞習漏。自然淨盡無餘。親見彌陀。不離本念。功成行滿。願力相資。臨命終時。定生上品。

淮陽曉山和尚修念佛箴云。示汝諸有情。可以整心趣。棄卻貪瞋癡。大家秉智慧。冷眼掛眉間。看破紅塵事。積金玉如山。難買三寸氣。眷屬與恩親。暫如傀儡戲。生前一聚首。死後誰能替。終有散場時。有甚風流致。靜裏細思量。一場無滋味。何不早休心。念佛修三昧。

又曰。今人皈投佛會。或為病苦而發心。或為報親而舉念。或為保扶家室。或為怖罪持齋。雖有信心。而無行願。罕有為自己生死。發願念佛。求生淨土者。與經中本意不合。修行弟子。當一念回光。修出世法。願捨娑婆。往生淨

土。正如久客在他鄉。思欲歸於故里也。求生淨土。在乎願力堅強。華嚴經言。是人臨命終時。一切諸根。悉皆散壞。惟此願王。不相捨離。於一切時。引導其前。一剎那中。即得往生極樂世界。

念佛原以了生死。蓮池大師常書生死事大四字於案頭以自策。及臨終謂弟子曰。老實念佛。莫換題目。藕益大師曰。夫念佛法門。別無奇特。只是深信力行為要耳。可惜今人將念佛看做淺近勾當。謂愚夫愚婦工夫。所以信既不深。行亦不力。終日悠悠。淨功莫剋。只貴信得及。守得穩。直下念去。或晝夜十萬。或五萬。三萬。以決定不缺為準。畢此一生。誓無改變。而不得往生者。三世諸佛。便為誑語。一得往生。則永無退轉。真能念佛。放下身心世界。即大布施。真能念佛。不復起貪瞋癡。即大持戒。真能念佛。不計是非人我。即大忍辱。真能念佛。不稍間斷夾雜。即大精進。真能念佛。不安想馳逐。即大禪定。真能念佛。不為他歧所惑。即大智慧。要到一心不亂境界。亦無他術。最初下手。須用數珠記得分明。刻定課程。決定無缺。久久純熟。不念自念。然後記數亦得。不記數亦得。若初心便要著相。要學圓融自在。總是信不深。

行不力。皆生死岸邊事。臨命終時。決用不著。

優曇大師曰。念佛人要知六度萬行。不出一心。人能執持一句阿彌陀佛。得成三昧。一念之中。與理相應。諸法現前。六度萬行。悉皆具足。

蓮池大師曰。或問今見世人念佛者多。生西方成佛者少。何也。此有三故。一者。口雖念佛。心中不善。以此不得往生。奉勸世人。既是念佛。便要依佛所說。要積德修福。要孝順父母。要忠事君王。要兄弟相愛。要夫妻相敬。要至誠信實。要柔和忍耐。要公平正直。要陰鷲方便。要慈惠一切。不殺害生命。不凌辱下人。不欺壓小民。但有不好心起。著力念佛。定要念退這不好心。如是纔是念佛的人。定得成佛。二者。口雖念佛。心中胡思亂想。以此不得往生。奉勸世人。念佛之時。按定心猿意馬。字字分明。心心照管。如親在西方面對。不敢散亂。如此纔是念佛的人。定得成佛。三者。口雖念佛。心中只願求生富貴。或說我等凡夫。西方無有我分。止圖來世不失人身。此則不合佛心。佛指引你生西方。你卻自不願生。以此不得往生。奉勸世人。凡念佛者。決意求生。休得疑惑。且如天宮富貴。福盡也要墮落。何況人間富貴。能有幾時。若說你

是凡夫。西方無分。則聖賢都是凡夫做。安知你不生西方也。便可發廣大心。立堅固志。誓願往生。見佛聞法。得無上果。廣度衆生。如此纔是念佛的人。定得成佛。

蘇東坡爲五祖戒禪師後身。常以阿彌陀佛像自隨。謂生西方公據。然聞公疾革時。語及西方。則曰。西方不無。但箇裏著力不得。夫修淨土者。必具三心。所謂深心。至誠心。回向發願心。乃至臨終十念。未有不著力而得者。至云著力不得。則三心未具。難保往生。

## 廣度門

矢決定之願者。自利復當利他。未能自度。而先度人。自他俱溺。固屬非宜。祇求自度。而不度人。即落二乘淺見。尤爲不合佛心。力雖未充。心無不具。儒書言自新新民。己立立人。皆是理也。

## 輯廣度門

龍舒淨土文曰。予爲此淨土說。欲勸一切見者聞者。廣大其心。以佛之心爲心。使人人盡生淨土。若止於自修。則是聲聞之徒。名爲小乘。如車乘之小者。僅能自濟而已。能廣勸人者。名爲大乘菩薩。如車乘之大者。人我兼濟。此獲福無量。所以至佛地也。勸人善道。名爲法施。淨土法門。爲法施之大者。遂超出輪回。非其他法施之比。故其福報。不可窮盡。大慈菩薩云。能勸二人修。比自己精進。勸至十餘人。福德已無量。如勸百與千。名爲眞菩薩。又能過萬數。即是阿彌陀。觀此則知西方之說者。豈可不廣大其心。而使人人共知此道。以積無量福報乎。

文彥博歷仕宋仁英神哲四朝。素皈依佛法。晚向道益力。專念阿彌陀佛。發願云。願我常精進。勤修一切善。願我了心宗。廣度諸含識。集十萬人爲淨土會。一時士大夫多化焉。年九十二卒。

又曰。人苦飢者。與之一食。苦寒者。與之一衣。已爲大惠。況彼沉淪六道。無有出期。我指示以此法門。使直脫輪回。受無窮無極之壽樂。其惠豈可窮盡乎。何則。淨土更無輪回。已不退轉。直至成佛而後已。生於彼者。雖未成佛。乃成佛之階梯。是勸一人修淨土。乃成就一衆生作佛也。衆生作佛。皆由我而始。則其福報。不勝於以恆河沙等身布施耶。

汶州二沙彌。同志念佛。經五年。長者先亡。至淨土見佛。自言有小沙彌與我同修。可得生否。佛言。由彼勸汝。汝方發心。汝今可歸。益修淨業。三年後。當同來此。至期。二人見佛與聖衆。自西而來。大地震動。天花飄舞。一時同化。

優曇大師云。學佛多門。大悲是菩薩正轍。利他要行。勸進乃淨業勝因。經言。若人以四天下七寶。供養佛及菩薩緣覺聲聞。得福甚多。不如勸人念佛。

一聲。其福勝彼。誠以財施。則濟一世之貧。食施。則濟一日之命。法施。則令人出世。其功德豈可比倫。財施如燈。止明一室。法施則如日。徧照大千。吝法而不勸修。累劫沉於黑獄。念佛而行化導。現生即是彌陀。廣布慈雲。遞相勸勉。推斯悲願。普結淨緣。拔沉溺之愛河。出輪回之苦海。齊登樂土。共報佛恩。

宋馮楫發願文云。予之施經。一事而具二施。以資造經。是謂財施。以經傳法。是謂法施。財施當得天上人間福德之報。法施當得世智辯聰蓋世之報。當知二報。皆輪回之因。苦報之本。我今發願。願回此二報。臨命終時。莊嚴往生西方極樂世界。普與衆生。悉得成佛。

又曰。佛言自未得度。先欲度人者。菩薩發心。自覺已圓。復覺他者。如來應世。蓮宗祖訓。創立淨土一門。行解相值。自利利人。化物無方。誨人不倦。稱曰導師。維摩經云。自疾不能救。云何救他疾。地獄報應經云。自不清淨。教人清淨。無有是處。智度論云。譬如二人。各有親屬。爲水所溺。一人情急。直入水救。爲無方便。彼此俱沒。一人往取船筏。乘之救濟。悉皆度脫。



念佛法門。須自修自行。一一修持。一一成就。既自利。然後利人。是乘彌陀之大願力船。救濟苦海中之沉溺也。其功德豈易量哉。

昔釋迦佛在世時。有一國難化。佛言與目連有緣。使往化之。其國人果皆從化。人問其故。佛言。往昔世目連嘗爲樵人。於山中驚起一羣蜂子。目連乃發善言曰。我得道後。盡度此蜂子。今此一城人者。乃當時蜂子也。目連發此善言。故爲有緣。由此觀之。非徒於一切人當勸修淨土。一切禽獸蠅飛蠕動之類。見之皆當念阿彌陀佛數聲。發願盡度。如是則善念純熟。上品上生矣。

## 徑中徑又徑徵義卷下

清歸安張師誠輯 海鹽徐槐廷徵義

### 勵汗法

#### 精持門

信既篤矣。願既堅矣。無實行以自勵。則信爲徒信。願爲徒願。空言無補。何能倖獲。凡事必有苦行。方可成就。況出世之大乎。今不必萬行全修。只此至易持名之徑路。猶不精心果力。可乎。持名者須以心念。莫但口念。平時妄念紛飛。無由覺察。一經手提數珠。始覺此心之難制。余根鈍障深。向用強制之法。手掐此珠。心隨此手。勿使一珠空過。庶幾稍有把握。爰採昔賢警語。銘諸座右。以收放心。而資省惕。

#### 輯精持門

西方確指。覺明妙行菩薩曰。大凡修淨土人。最忌夾雜。何謂夾雜。即是

又諷經。又持呪。又做會。又好說些沒要緊的禪。又要談些吉凶禍福。見神見鬼的話。卻是夾雜也。既夾雜。則心不專一。心不專一。則見佛往生難矣。卻不空費了一生的事麼。如今一概莫做。只緊緊持一句阿彌陀佛。期生極樂。日久成功。方不錯卻。偈曰。阿彌陀一句。萬法之總持。心與聲相依。念茲復在茲。感應不思議。蓮開七寶池。又偈曰。少說一句話。多念一句佛。打得念頭死。許汝法身活。

萬益大師曰。念佛之人。切忌今日張三。明日李四。遇教下人。又思尋章摘句。遇宗門人。又思參究問答。遇持律人。又思搭衣用鉢。此則頭頭不了。帳帳不清。普濟慈航云。凡修淨土。除念佛外。惟誦淨土真言。超度一切衆生。往生西方則可。餘與淨土無涉。

又曰。大抵修淨業人。行住坐臥。起居飲食。俱宜西向。則機感易成。室中祇供一佛。一爐。一經。一桌。一椅。不得放多餘物件。庭中亦掃除潔淨。使經行無礙。要使此心一絲不掛。萬慮俱忘。空空洞洞。不知有身。不知有世。並不知我今日所作是修行之事。如是則與道日親。與世日隔。可以趨向淨業。

蓋汝生時拋撇得乾淨。念頭上不存些子根節。大限到來。灑灑落落。不作兒女子顧戀身家子孫之態。豈不是大丈夫舉動。

法光禪師具宗門作用。德清師請益。曰。無奇特。只離心意識。參出聖凡路。師往憨山住。一日。粥罷經行。介爾立定。不見身心世界。唯一大光明圓滿無邊。山河大地。影現其中。比覺覺身心了不可得。示衆偈云。瞥然一念狂心歇。內外根塵俱洞徹。翻身觸破太虛空。萬象森羅從起滅。自此湛然度日。一切聲色無礙。知見頓空。常以修西方法要示世。

又曰。有問念佛不能一心。當作何方便。菩薩曰。汝但息想定慮。徐徐念去。要使聲合乎心。心隨乎聲。念久自得諸念澄清。心境寂照。證入念佛三昧。然平日必須多念。從千至萬。心無間斷。則根器最易純熟。若強之使一。終不一也。

張光緯念佛說曰。經云。執持名號。一心不亂。吾今作一方便。自視此心如淨寶瓶。佛名如穀。逐字逐句。如穀投瓶。貫珠而下。穀既無盡。瓶亦不滿。不放一粒。拋向瓶外。顧念此瓶。不滿徑寸。中藏三千大千世界百億微塵數佛。

我亦與之俱會一處。游樂宴息。方是我安身立命處。

蓮池大師曰。彌陀經言。若人念佛。臨命終時。必生彼國。又觀經言。念佛之人。生彼國者。蓮分九品。蓋此念佛法門。不論男女僧俗。不論貴賤賢愚。但一心不亂。隨其功行大小。九品往生。故知世間無一人不可念佛。若人富貴。受用現成。正好念佛。若人貧窮。家小累少。正好念佛。若人有子。宗祀得託。正好念佛。若人無子。孤身自由。正好念佛。若人子孝。安受供養。正好念佛。若人子逆。免生恩愛。正好念佛。若人無病。趁身康健。正好念佛。若人有病。切近無常。正好念佛。若人年老。光景無多。正好念佛。若人年少。精神清利。正好念佛。若人處閒。心無事擾。正好念佛。若人處忙。忙裏偷閒。正好念佛。若人出家。逍遙物外。正好念佛。若人在家。知是火宅。正好念佛。若人聰明。通曉淨土。正好念佛。若人愚魯。別無所能。正好念佛。若人持律。律是佛制。正好念佛。若人看經。經是佛說。正好念佛。若人參禪。禪是佛心。正好念佛。若人悟道。悟須佛證。正好念佛。普勸世人。火速念佛。九品往生。華開見佛。見佛聞法。究竟成佛。始知自心。本來是佛。

無名僧者。居湖廣黃州。專持阿彌陀佛。隨所見皆稱阿彌陀佛。崇禎時。張獻忠攻黃州。僧坐城上。夜間高唱阿彌陀佛。軍士縛投城下。俄而復上唱佛。每東城下。西城上。南城下。北城上。始敬禮焉。一日見一雞。高聲唱佛。雞亦隨聲而唱。端午見遊船中人。大哭曰。衆生以苦爲樂。乃如是耶。弟子錢生懇示修行之要。曰。一心念阿彌陀佛。

又曰。念佛有默持。有高聲持。有金剛持。然高聲覺太費力。默念又易昏沈。只是縣縣密密。聲在於唇齒之間。乃爲金剛持。又不可執定。或覺費力。則不妨默持。或覺昏沈。則不妨高聲。如今念佛者。只是手打魚子。隨口叫喊。所以不得利益。必須句句出口入耳。聲聲喚醒自心。譬如一人濃睡。一人喚云某人。則彼即醒矣。所以念佛。最能攝心。

空谷大師曰。念佛一門。修行捷徑。緊念慢念。高聲低聲。總無拘礙。但令身心閒淡。默念不忘。靜鬧閒忙。一而無二。忽然觸境遇緣。打著轉身一句。始知寂光淨土。不離此處。阿彌陀佛。不越自心。優曇和尚令人提云念佛者是誰。或云那箇是我本性彌陀。謂是攝心念佛。參究念佛。今不必用此法。只用

平常念去。

又曰。夫學佛者。無論莊嚴形迹。止貴真實修行。在家居士。不必定要緇衣道巾。帶髮之人。自可常服念佛。不必定要敲魚擊磬。好靜之人。自可寂默念佛。不必定要成羣做會。怕事之人。自可閉門念佛。不必定要入寺聽經。識字之人。自可依教念佛。千里燒香。不如安坐家堂念佛。供奉邪師。不如孝順父母念佛。廣交魔友。不如獨身清淨念佛。寄庫來生。不如見在作福念佛。許願保懷。不如悔過自新念佛。習學外道文書。不如一字不識念佛。無知妄談禪理。不如老實持戒念佛。希求妖鬼靈通。不如正信因果念佛。以要言之。端心滅惡。如是念佛。號曰善人。攝心除散。如是念佛。號曰賢人。悟心斷惑。如是念佛。號曰聖人。

師曰。我出家後。到處參訪。時徧融師門庭大振。予至京師叩之。膝行再請。師曰。你可守本分。不要去貪名逐利。不要去攀緣。只要因果分明。一心念佛。予受教出。同行者大笑。以這幾句話。那箇說不出。千里遠來。只道有甚高妙處。原來不值半文。予曰。這箇正見他好處。我們渴仰企慕。遠來到此。

他卻不說元說妙。凌駕我們。只老老實實。把自家體認過切近精實的工夫。丁寧開示。故此是他好處。我至今著實遵守。不曾放失。

又曰。予昔在鍊磨場中。時方丈謂衆曰。中元日當作盂蘭齋。予以爲設供也。俄而無供。惟念佛三日而已。又聞昔有院主爲官司所勾攝。堂中第一座集衆救護。以爲持誦也。亦高聲念佛而已。此二事迥出常情。有大人作略。真可師法。

優曇大師蓮宗寶鑑曰。離相念佛三昧無住法門。慈照宗主云。離相念佛三昧者。上根智人。悟此深理。常運虛空平等心。無我人衆生壽者相。經云。離一切諸相。即名諸佛。由是念念彌陀出世。處處極樂現前。如此者。離相則無相。無相則無住。無住則入佛境界。此乃無上正真大菩薩道。

金剛經云。應如是生清淨心。應無所住而生其心。清淨體中。空空蕩蕩。晃晃朗朗。一無所有。一切無住。心要訣云。冥心本乎無住。無住心體。圓融不測。淨名經云。一切法以無住爲本。安住無爲。名之爲住。住無方所。故名無住。無住心者。是爲真心。

空觀念佛三昧無念法門。空觀念佛三昧者。智者大師示三止三觀之法。先空。次假。次中。今欲令行者返妄歸真。先觀一切法是假。乃至四大五蘊六根六塵六識。盡十方世界山河大地。皆無一物。了知虛妄而得會真。修此者。先要攝心靜坐。將世間一切虛妄不實境界。盡情掃蕩。俱不住著。唯觀於空。並空空亦不可得。如是頓入如來寶明空海。性覺真空。即如來藏。

瓔珞經云。世人不能成道而脫生死者。良由妄念爲輪迴種子耳。釋教以無念爲宗。若見一切法。心不染著。是爲無念。無念之念。乃爲正念。圭峰師云。覺諸相空。心自無念。念之即覺。覺之即無。修行之妙。惟在於此。古德云。大道教人先止念。念頭不住也徒然。

參禪念佛三昧究竟法門。遠祖師禪經序云。禪非智無以窮其寂。智非禪無以深其照。禪智者。寂照之謂也。念佛之人。欲參禪見性。但依此法。要於靜室正身端坐。掃除緣累。截斷情塵。外不著境。內不住定。回光一照。內外俱寂。然後密密舉念南無阿彌陀佛三五聲。豁然明悟。親見本性彌陀。內外身心。一時透脫。盡乾坤大地。是箇西方。萬象森羅。無非自己。靜無遺照。動不離

寂。得生上品。名實報莊嚴土。

永明禪師四料簡云。有禪無淨土。十人九錯路。陰境若現前。瞥爾隨他去。無禪有淨土。萬修萬人去。但得見彌陀。何愁不開悟。有禪有淨土。猶如帶角虎。現在爲人師。將來作佛祖。無禪無淨土。鐵牀與銅柱。萬劫與千生。沒箇人依怙。蓮池師云。參禪主乎見性。單持乃切往生。念佛人見性。正上品上生事。若云經中專言執持名號。曾無參究之說。但欲存此廢彼則不可。蓋念佛人見性。豈患其不生耶。

攝心念佛三昧調息法門。坐禪三昧經云。菩薩坐禪。不念一切。惟念一佛。即得三昧。初機修習。未免昏散二病。人天寶鑑云。凡修禪定。即入靜室。正身端坐。數出入息。從一至十。從十至百。至千萬。此身兀然。此心寂然。與空虛等。不煩禁止。自得明悟。今此攝心念佛。欲得速成三昧。數息最要。凡欲坐時。先想己身在圓光中。默觀鼻端。想出入息。每一息默念南無阿彌陀佛一聲。方便調息。不緩不急。心息相依。勿令間斷。乃至深入禪定。息念兩忘。即此身心。與虛空等。久久純熟。心眼開通。三昧忽爾現前。即是唯心淨土。

唐飛錫大師云。世上以水晶。菩提。木槵爲數珠多矣。吾則以出入息爲念珠焉。稱佛名號。隨之於息。行住坐臥。常用此珠。縱令昏寐。含佛而寢。覺即續之。必於夢中得見彼佛。夢之不已。三昧成焉。面覩玉毫。親蒙授記。則萬無一失也。

一相念佛三昧專念法門。大般若經云。佛告曼殊室利言。菩薩能正修行一相莊嚴三昧。疾證菩提。修此行者。應離喧雜。不思衆相。專心繫念於一如來。審取名字。善想容儀。即爲普觀三世一切諸佛。即得諸佛一切智慧。天台十疑論云。衆生根鈍。濁亂者多。若不專心繫念一佛。則心散漫。三昧難成。故專令念阿彌陀佛。即是一相三昧。

彌陀疏鈔曰。或謂佛佛可念。何不隨念一佛。而必念阿彌陀佛。不知彼佛與諸衆生偏有因緣故。良由彼佛名號。人所樂稱。就令惡人。有時不覺失聲念佛。人逢喜事。不覺念佛。人逢惡事。及與苦難。不覺念佛。莫或使之而自然者。則專念彌陀。即得三昧。

憨山大師曰。佛爲救度娑婆世界諸苦衆生。專說西方極樂淨土法門。但專

念阿彌陀佛。發願往生彼國。有彌陀經一卷。所說都是彼佛國土境界實事。其修行之方。但以念佛爲主。每日早起禮佛。即誦彌陀經一卷。或金剛經一卷。即持數珠。誦阿彌陀名號。或二五千聲。或一萬聲。完即對佛回向。發願往生彼國。此是早功課。晚亦如是。以爲定課。每日除二時功課之外。於二六時中。單將一聲阿彌陀佛。橫在胸中。念念不忘。心心不昧。把一切世事。都不思想。但只將一句佛。作自己命根。咬定牙關。決不放捨。乃至飲食起居。行住坐臥。此一聲佛。時時現前。若遇順逆喜怒煩惱境界。心不安時。就將者一聲佛。提起一拶。即見煩惱當下消滅。以念念煩惱。是生死苦根。今以念佛消煩惱。便可了得生死。更無別法。若念佛念到煩惱上作得主。即於睡夢中作得主。若於睡夢中作得主。則於病苦中作得主。若於病苦中作得主。則於臨命終時。分明了了。便知去處矣。此事不難。只要一念爲生死心切。單單靠定一聲佛。再不別向尋思。久久純熟。自然得大安樂自在。得大歡喜受用。

白樂天念佛偈云。余年七十二。不復事吟哦。看經費眼力。作福畏奔波。何以度心眼。一聲阿彌陀。行也阿彌陀。坐也阿彌陀。縱饒忙似箭。不廢阿彌陀。

陀。日暮而途遠。吾生已蹉跎。旦夕清淨心。但念阿彌陀。達人應笑我。多卻阿彌陀。達又作麼生。不達又如何。普勸法界衆。同念阿彌陀。

張光緯念佛說曰。石南和尚偈云。念佛切莫貪多念。且念一百心不亂。九十九聲心念差。捩轉念珠多不算。如是一百百至千。從千至萬如珠貫。箭射不入刀不侵。百萬魔軍皆退竄。吾向來念佛。亦只兀兀念過。今始知須字字從心裏出。還字字入心裏去。當念佛時。先要閉目端坐。凝神定慮。不可有雜亂心。躁競心。昏惰心。開口出聲。務令聲從心發。心藉口傳。息調聲和。不徐不疾。字字分明。句句相續。分之則一字可作一句讀。貫之則百千句直如一句。緜緜密密。自一聲至千萬聲。自一刻至十二時。無斷無續。不缺不漏。久之純熟。花開見佛。

呂祖偈云。念佛虔誠便是丹。念珠百八轉循環。念成舍利超生死。念結菩提了聖凡。念意不隨流水去。念心常伴白雲閒。念開妙竅通靈慧。念偈今留與汝參。


明徑山覺浪道盛禪師念佛直指圖說。

勵行法 精持門

61

徑中徑又徑微義(卷下)

62



師云。佛法之要。莫過參禪。念佛。持呪。修觀。持戒。修福也。而念佛三昧。最爲尊特。蓋人祇有一心。既此心全提心佛。則一切妄念。雜念。皆攝歸於不亂之正念。無始來業識種子。悉融化爲獨露之真心。正以全提心佛。萬法皈依。不假方便。自得頓超。此法門自遠公開宗。結社廬山。如十八高賢輩。各有感應。及臨終見佛。聖境現前。而得往生者無算。是皆一生取辦。不待來世再修。故吾特創立此圖。以明馬祖即心是佛之宗旨也。

圓信師云。一心不亂者。只以一句佛名。極力追頂。猛之又猛。情識一斷。則過去事。思量不來。未來事。卜度不著。現在境。心識不撓。三心斷絕。謂之前後際斷。目前如大圓鏡中所現森羅萬象。了無一物可指。蕩然身心。如雲去來。此箇光景。名爲一心不亂。到此便無心可亂也。現今目前。便是極樂世

界。山光水聲。無非佛法。所以臨終時。便無痛苦。

石雨方禪師云。念佛有多種。有漸。有頓。有頓中漸。有漸中頓。所謂漸者。如今人油口念佛。雖不知觀相。不識西方。他後直至善惡業報盡時。這一句油口彌陀。也用得著。若是頓念的人。直下持名。或一日。或七日。念得一心不亂。不獨死後往生。即現在彌陀全身顯現。更有要識念佛是誰的人。隨念隨叩到無可叩處。忽然撞著。此便是頓中漸。若漸中頓者。不管你西方東土。也不管你淨念散念。只要一句念得著。便是好手。所謂若人散亂心。入於塔廟中。一稱南無佛。皆已成佛道。

蓮池大師曰。予見新學生。把一句佛。頓在心頭。閒思妄想。越覺沸騰。便謂念佛不能攝心。不知萬念紛飛之際。正是做工夫時節。旋收旋散。旋散旋收。久後工夫純熟。自然妄念不起。且汝之能覺妄念重者。虧這一句佛耳。如不念佛時。瀾翻潮湧。剎那不停。自己豈能覺乎。按此則散亂心念佛。必得久歸純一也可。

## 兼觀門

古德謂衆生心雜。觀想難成。是以惟勸專持名號。夫觀法亦分事理二門。理觀之細。如所謂一心三觀。元妙精微。誠非初心凡夫所能猝就。其事觀工夫。於十六觀中。隨取一觀。時時觀想。專注勿移。心境空澄。持誦更爲得力。平時觀想既熟。臨期境乃現前。此爲騎馬拄杖把穩要法。不可不兼修也。

## 輯兼觀門

龍舒淨土文曰。齋戒潔已。清心靜慮。面西安坐。閉目默然。觀想阿彌陀佛真金色身。在西方七寶池中。大蓮華上坐。其身長丈六。兩眉中間向上有白毫一條。八棱中空。右旋轉五遭。光明照耀金色面與金色身。次停心注想於白毫。更不得妄有分毫他念。當令閉眼開眼。悉皆見之。蓋欲念念不忘也。如此久久。念心純熟。自然感應。見佛全身。此法最爲上。謂身想佛時。此身即是佛。又過於口念也。身後必上品上生。唐啓芳圓果二人作觀想法。只五月。自覺身到淨土。見佛聞法。



唐啓芳圓果二法師於藍田縣悟真寺。一夏結期。念阿彌陀佛。晝夜觀念不捨。閱五月。於觀想中。覺身臨寶池。見觀音勢至。坐二大蓮華。有千萬蓮華彌滿其間。阿彌陀佛從西來。坐一最大蓮華。光明映照。芳果作禮問曰。闍浮提衆生。依經念佛。得生此否。佛言。勿疑。定生我國也。又聞釋迦世尊。與文殊菩薩讚法華經。其前有三道寶階。其一白衣。其二僧俗相半。其三唯僧也。云皆是念佛人來生此矣。芳果出定。與其徒言如此。

宋遵式往生坐禪觀法云。欲修往生觀者。當於一處繩牀西向坐已。自想所修。合生極樂世界。便起心生於彼想。於蓮華中結跏趺坐。作華合想。作華開想。當華開時。有五百色光來照身想。作眼目開想。見佛菩薩及國土想。即於佛前坐聽妙法。及聞一切音聲。皆說所樂聞法。作此想時。大須堅固。令心不散。心想明了。如眼所見。經久乃起。又直想阿彌陀佛丈六金軀。坐於華上。專繫眉間白毫一相。其毫長一丈五尺。周圍五寸。外有八楞。其毫中空。右旋宛轉。在眉中間。瑩淨明徹。顯映金顏。作此想時。停心注想。堅固勿移。如鏡中面象。如水中月影。心想寂靜。則能成就念佛三昧。

幽溪大師曰。凡於行住坐臥時。則一心稱名。凡於趺坐蒲團時。則心心作觀。行倦則趺坐以觀佛。坐久則經行以稱名。苟於四威儀中。修之無間。往生西方必矣。

憨山大師云。一心持名。固是正行。又必資以觀想。更見穩密。其法就念佛時。心中時時默下觀想。想目前生一大蓮華。不拘青黃赤白。狀如車輪之大。觀想華狀分明。仍想自身坐在華中鬚臺之上。端然不動。想佛光明來照其身。作此想時。不拘行住坐臥。亦不計歲月日時。只要觀境分明。開眼合眼。了了不昧。乃至夢中亦見阿彌陀佛與觀音勢至同坐花中接引。一念之頃。即得往生西方極樂世界。居不退地。永不復來受生死之苦。

明僧性專。十二時唯誦法華。行深禪定。嘗於空中見西方寶池。成琉璃色。深廣無際。以白妙峰師。妙峰曰。此觀行初成之相。不生取著。是善境界。專遂深秘不言。

明唐宜之曰。竊見邇年禪律講之期。所在宣揚。唯淨土觀門。廢閣不講。夫世間口裏誦佛之人不少。而生淨土不多者。不修觀門故。蓋往生者。心能往。

口不能往也。使修觀之人。著衣喫飯。常在觀中。或神遊蓮海。華中禮佛。或坐矚金容。光輝四映。或面覩彌陀。身滿虛空。或靜見伴侶。同臨德水。淨想既成。往生何待。

宜之名時。專修佛觀。過南京長干寺。禮塔念佛次。見塔頂放白光。佛爲現相。如黃金色。一日坐禪堂。推窗忽見大海中湧一山。佛坐其上。光明四徹。牆壁林木。盡空不見。其精誠所感如此。

張次民曰。念佛之法。須兼作觀。瞑目向西。端坐默想。神與形離。驀直西去。漸見樹林及諸水鳥。金繩界道。欄楯交羅。取次過行。寶池勝蓮香臺樓閣。種種在目。儼然如來現身丈六。觀音侍左。勢至侍右。放眉間光。垂手接引。我及海衆。同攝光中。隨引而上。禮足悲懇。於時忽見金掌摩頂。甘露灑身。此心廓然。獲大安隱。徐徐神返。若出定然。於彼界中。日遊一遍。往生路熟。時至不迷。願以此告諸念佛人。須知心念。莫但口念。入此門時。去佛不遠。

顧原。號寶幢居士。精修禪觀。慈山清公一日至棲霞寺。望見一道者。問

勵行法 兼觀門

67

徑中徑又徑微義(卷下)

68

閒如孤鶴。即之其目不瞬。脫若遺世。已而入殿門。禮舍利塔。瞻拜良久。塔頂忽現五色光。赭如寶錯。清公異之。以語雲谷。雲谷曰。此寶幢也。作西方觀耳。頃之。示微疾。語曰。我坐蓮華中半月餘。見彌陀法身。徧虛空世界皆金色。佛視我微笑而挈我。又以袈裟覆我。我決定往生西方矣。

阿彌陀經疏鈔云。修淨土者。若禮佛時。當想己身在蓮華中作禮。佛在蓮華中受我禮敬。若念佛時。當想己身在蓮華中結跏趺坐。佛在蓮華中接引於我。然後一心持名。昔有二僧作蓮華開合想。遂得往生。況復加之一心持名而不往生乎。專主於觀想者。少時持名。專主於持名者。少時觀想。亦隨分之意也。

楚石琦禪師。專志淨業。室中置一小牀。日趺坐默觀大蓮華出現。其華莖葉。充滿法界。有一如來。相好端嚴。坐其上。眉間白毫放出光明。其光所照樓臺池沼。行樹欄楯。衆寶間錯。水鳥天樂。皆演苦空無我之法。見觀音勢至。在其左右。清淨海衆。皆得不退轉。從定而起。空空不可得矣。有懷淨土詩百韻行世。

## 斷愛門

執持觀想之功。未嘗無勤勤懇懇者。而於世緣未能割斷。愛情牽曳。即妄念紛飛。有所好樂。固爲愛。忿懣憂患恐懼。亦由愛而生。心不能正。職是之由。縱平時觀破。而臨事難免動心。以致淨功無成。良可歎惜。必有堅忍之力。斫斷愛繩。時時體察。由強制而至於自然。其庶幾乎。

## 輯斷愛門

覺明妙行菩薩曰。有問。學人云何得離塵欲。得無障礙。菩薩曰。我將由小而推之大。由外而推之內。汝等當善解其義。有人於此。無故而奪汝一文。動瞋恨否。曰。一文雖微。見奪則瞋。又無故而予汝一文。生喜悅否。曰。一文雖微。見予則喜。有答以一文甚微。予何足喜。奪無可瞋者。菩薩曰。汝能如是。心之清淨久矣。何至今日尙沉濁垢耶。汝等當知學人見有見無。處處是著。念念皆貪。欲斷貪著。先從一錢之予奪。作棄捨想。作非我有觀。奪不起瞋。予不起悅。如是乃至百千萬錢。乃至億億萬錢。乃至身肉骨髓。乃至妻子

財產。乃至過現未來心意意識。乃至生死業報菩提涅槃。一切皆如此一錢之予奪。自然習漏消亡。障緣永滅。漸復清淨。成就道品。汝等依此修行。勿更自虞窒礙。又曰。汝等慮身纏世網。念頭不得乾淨耶。我有一法。汝但發箇遠離求度之願。將牢牢歸向極樂世界。見阿彌陀佛之心。換卻勞勞奔走名利之心。便能脫塵勞而即覺路矣。

宋僧法一。宗杲。從東都避亂渡江。各攜一笠。杲笠中有黃金釵。每自檢視。一伺知之。杲起如廁。一亟探釵擲江中。杲還亡釵。不敢言而色變。一叱之曰。與汝共學了生死大事。乃眷眷此物耶。我適已爲汝投之江流矣。杲展坐具。作禮而行。

幽溪大師淨土法語曰。楊次民謂愛不重。不生娑婆。念不一。不生極樂。娑婆有一愛之不輕。則臨終爲此愛所牽。矧多愛乎。極樂有一念之不一。則臨終爲此念所轉。矧多念乎。所謂愛者。自父母妻子。昆弟朋友。功名富貴。文章詩賦。道術技藝。衣服飲食。屋宇田園。林泉花卉。珍寶玩物。有一物之不忘。愛也。有一念之不遺。愛也。有一愛存於懷。則念不一。有一念不歸於一。

則不得生。問輕愛有道乎。曰。輕愛莫要於一念。問一念有道乎。曰。一念莫要於輕愛。欲輕其愛者。莫若杜其境。衆境皆空。萬緣都寂。萬緣都寂。一念自成。一念既成。則愛緣俱盡矣。曰。杜境有道乎。曰。杜境者知萬法本自不有。有之者情故。情在物在。情空物空。萬法空而本性現。本性現而情念息。是以欲杜其境。莫若體物虛。體物虛。則情自絕。情絕則愛不生。而唯心現。念一成。圓覺經云。知幻即離。不作方便。離幻即覺。亦無漸次。功效之速。有如桴鼓矣。

明周廷璋。生於正德嘉靖間。爲人醜朴。治家不計。有輒散之貧者。人與之語。輒笑。或譴之。詈辱之。亦笑而已。晨起必誦金剛彌陀觀音經。各一卷。曰。吾不離日用。不涉貪愛而已。年八十七將終。謂家人曰。觀音謂我絕葷五日可西行。遂日食一蔬一粥。誦經而逝。

憨山大師曰。念佛求生淨土。原是要了生死大事。如何得了生死。如何是生死根株。古人云。業不重不生娑婆。愛不斷不生淨土。是知愛乃生死根株。既不知生死根株。則念佛一邊念。生死根只聽長。如此念佛。念到臨命終時。

只見生死愛根現前。那時方知佛全不得力。悔之遲矣。故勸今念佛人。先要知愛是生死根株。而今念佛。念念要斷這愛根。如眼中見的兒女子孫。家緣財產。無一不是愛的。全身在火坑中一般。這一聲佛。果能斷得這愛否。若斷不得這愛。如何了得生死。故勸念佛人第一要在生死根株上。念念斬斷。則念念是了生死之時也。

蔣太史超。記前世爲義帽僧。數夢到故居庵前濯足。爲人篤嗜內典。一意台宗。雖早登禁林。嘗有出世之想。假歸江南。遂之義帽。示疾恒化。自書偈云。翛然猿鶴自來親。老衲無端墮業塵。安向鑊湯求避熱。那從大海去翻身。功名傀儡場中物。妻子骷髏隊裏人。只有君親無報答。生生常自祝能仁。

周克復淨土晨鐘曰。佛以貪瞋癡爲三毒。貪毒在心。而見之於身。則爲盜。而五欲。色爲最。圓覺經云。一切衆生。皆因姪慾而正性命。楞嚴經云。姪心不除。塵不可出。又云。汝以姪心。求佛妙果。縱得妙悟。皆是姪根。輪轉三途。必不能出。此經首借姪室立言。蓋直從衆生根本無明。首拈立案。然後向道有機。實是如來頂門針法。

蔣十八者。海鹽人。中年與其妻合志修行。斷除愛慾。一日各炷香唱佛名。並書一頌而逝。蔣頌曰。這箇幻身。四大合成。今日分散。各歸其根。諸幻既滅。灰飛煙絕。如空中風。如碧天月。既無障礙。又能皎潔。一切永斷。無有言說。四十年來。脫離嗜慾。惟闡大乘。朝誦暮讀。今朝撒手西歸。自有現成果足。其妻頌曰。看過蓮經萬八千。平生香火有因緣。西方自是吾歸路。風月同乘般若船。

又曰。四十二章經云。佛言。慎勿視女人。亦莫共言語。若與語者。正心思念。我爲沙門。處於濁世。當如蓮華。不爲泥所汙。想其老者如母。長者如姊。少者如妹。稚者如子。生度脫心。息滅惡念。按此經語。實釋氏最典則之訓。不止沙門宜然也。

祖通禪師。幼入社學讀書。因見雲水道人。皓首長眉。色若孺子。與先生論養生之術。言及字學。曰。古之造字者。皆識道也。且如寇字從完從女者。言人本來完固。體上不知謹守。而反引賊入寇。自劫家寶者。莫甚乎女也。故會意缺守加女而爲寇。師一聞此語。膽戰心寒。凡避色如避蛇虺。遂逃至鵲山

剃度。自此心安志定。惟以生死是念。皈依淨土。

## 飭終門

平日積功累行。去愛絕非。本爲末後臨終作預辦之計。若至末後臨終之時。忽又畏死傍徨。中情感亂。豈不大負初心。其時必須竭力把持。拋棄一切。正念分明。方有趨向。是功行固在平時。而喫緊尤在末後也。

## 輯飭終門

善導和尚曰。凡一切人命終。須是不得怕死。常念此生多苦。若得捨此。超生淨土。受無量快樂。乃是稱意之事。如脫敝衣。得換珍服。其於敝衣。誰肯戀著。但遇病時。便念無常。一心待死。叮囑家人。及看病往來問候之人。凡來我前。不得說眼前閑雜之話。亦不得輒言安慰。祝願康健。此皆虛花無益。若病重將終。親屬亦不得垂淚哭泣。歎嗟懊惱。惑亂心神。但當同聲念佛。助其往生。待氣盡了多時。然後哀哭未晚。若識死是歸去。能悲哀泣。尤爲達理。況往生淨土。捨苦得樂。慎勿哭泣。使死者心亂也。予又多見世人平常念佛禮懺。發願求生西方。及至病來怕死。都不說著往生之事。直待氣消命盡。識投

冥界。方始十念鳴鐘。恰如賊去關門。濟何事也。死門事大。須是自家著力始得。若一念差錯。歷劫受苦。誰人相代。思之思之。

明戈以安。事雲棲爲師。事親孝。好行陰德。晚歲奉佛甚虔。預刻歸期。家人來視甚悲。以安曰。生必有滅。奚悲爲。吾方凝神淨域。面覲彌陀。若等勿以情愛亂我正念。遂唱佛而化。又朱元正。日誦法華。將逝。預戒家人。臨行勿令婦女來。過二三時乃來。來亦勿哭。後家屬至皆哭。元正復張目搖頭。令婦女去。去盡乃瞑。

龍舒淨土文曰。或問下品下生者。臨終時。地獄形相已現。能至心十念南無阿彌陀佛。則變地獄形相爲蓮華。亦生淨土。何也。答曰。此佛慈悲至深。威力至大。故能如此。譬如鐵石雖重。賴舟船力。可以渡江。一針雖輕。不賴舟船。江不可渡。蓋人有重罪。仗佛力者。可生淨土。罪惡雖輕。不仗佛力。亦不得生。又如平生爲惡。一日招安。遂爲良民。仗佛力而消罪惡者。亦復如是。又如蟻蝨。萬死萬生。不能一里。若附人身。千里可至。仗佛力而生淨土者。亦復如是。或云。人平生爲惡。殺害衆生。苦虐人民。臨死念佛。亦得往

生。其所殺所苦之衆生。懷冤枉之心。何時得解乎。曰。生淨土得道之後。皆度脫一切冤親。豈不勝冤冤相報。彼此無出期者乎。

唐張善和屠牛爲業。臨終見生數十頭索命。善和告妻延僧念佛。僧曰。經言。若有衆生。作不善業。應墮惡道。至心十念阿彌陀佛者。即得往生阿彌陀佛極樂國土。善和云。地獄至。急取香爐來。即以左手擎火。右手拈香。向西厲聲稱佛。未滿十聲。遽云。佛來迎也。已與我寶座。言訖而終。

天如或問曰。一生造惡。臨終念佛。帶業往生。然則我且做世事。臨終念佛可乎。答曰。苦哉苦哉。逆惡凡夫。臨終念佛。是夙有善根。故遇善知識而得念佛。此等僥倖。萬中無一。羣疑論云。有十種人。臨終不得念佛。一善友未必相逢。無勸念佛人。二業苦纏身。不遑念佛。三偏風失語。四狂亂失心。五遭水火。六遇虎狼。七惡友破壞信心。八昏迷致死。九陣亡。十墜高巖。忽然遭著一種。便做手腳不得也。即無此惡緣。好病而死。未免風刀解體。四大分離。痛苦逼迫。怕怖惺惶。念佛不得也。即無病而死。世緣未了。擾亂胸懷。又兼妻啼子哭。百種煎憂。念佛不得也。即未死以前。忍疼忍苦。叫喚呻吟。

更或醫藥祈禱。雜念紛飛。念佛不得也。即未病以前。只是年紀老大。衰相現前。困頓龍鍾。愁歎憂惱。念佛不得也。即未老以前。稍或俗務相關。狂心未歇。胡思亂想。業識茫茫。念佛不得也。即或清閒自在。有志修行。稍於世相照不破。放不下。境界現前。隨他顛倒。念佛不得也。你看老病之時。少壯清閒之日。稍有一事掛心。早是念佛不得。況臨終時哉。且世事如夢。那一件替得生死。天堂未開。地獄先成。生死未明。皆成苦本。眼光落地受苦之時。方知平日所爲。盡是枷鎖鑊湯地獄。失卻人身。萬劫難復。鐵漢聞之。也應淚落。曾許他臨終念佛乎。人生在世。能有幾時。石火電光。眨眼便過。趁此未老未病之前。抖擻身心。撥棄世事。得一日光景。念一日佛名。得一時工夫。修一時淨業。由他臨命終時。好死惡死。我之盤纏預辦也。我之前程穩穩當當也。若不如此。後悔難追。

王龍舒曰。譬如人入大城中。必先覓安下處。卻去幹事。抵暮昏黑。則有投宿之地。先覓安下處者。修淨土之謂也。抵暮昏黑者。大限到來時也。有投宿之地者。蓮華中生。不落惡趣之謂也。又云。晝必有夜。必爲夜備。晝必有

寒。必爲寒備。存必有亡。必爲亡備。何爲夜備。燈燭牀褥。何謂寒備。衾裘薪炭。何謂亡備。福慧淨土。

優曇大師曰。凡修淨土之人。每念世間一切無常。成必有壞。生必有死。若不親聞佛法。則捨身受身。輪轉三界。四生六道。無解脫期。我今有緣。得聞正法。得修淨業。唯佛是念。捨此報身。當生淨土。入彼蓮胎。受諸快樂。永脫生死。不受輪回。此乃大丈夫平生之能事也。纔有疾病。正要向前。坦蕩身心。莫生疑慮。直須西向正坐。專想阿彌陀佛。與觀世音大勢至菩薩及無數化佛。現在其前。一心稱念南無阿彌陀佛。聲聲不絕。於諸世間一切事務。不得思念。不得貪戀。若或心念起來。但要急稱佛號。於念念中除滅罪障。只此一念。決定往生淨土。

明袁宗道。子登。年十二。病瘡將終。語宏道曰。死矣。叔父何以救我。宏道曰。汝當念佛。即得往生佛國。此五濁世。不足戀也。遂合掌稱阿彌陀佛。諸眷屬同聲助之。頃之。微笑云。見一蓮華色微紅。俄而曰。花漸大。色鮮明無比。俄而曰。佛至矣。相好光明。充滿一室。頃之。氣促。宏道曰。汝但稱

佛字可也。登稱佛數聲。合掌而逝。

蓮池大師曰。生死有命。則人於病中。當生大解脫。任其死生。莫起恐怖。又過去如幻。現在如幻。未來如幻。盡情放下。單持正念而已。又與王大璋曰。貴恙宜將身外事。併此身四肢百骸。盡情放下。使空無一物。若必不可歇者。權且歇下。待後處之。妄想熾不能制。當念佛數聲壓伏之。世間榮華富貴。不過片時。厄難苦惱。亦不過片時。且萬般皆屬前緣。非人力所能爲。盡情放下。一心念佛。至囑。

真歇師偈云。訪舊論懷實可傷。經年獨臥涅槃堂。門無過客牕無紙。爐有寒灰席有霜。病後始知身是苦。健時都爲別人忙。老僧自有安閒法。八苦交煎總不妨。此偈傷身世之浮脆。了夢幻之起滅。指情妄之所緣。示斯道之真寂。五十六言。網羅殆盡。眞人之龜鑑也。

淨土晨鐘曰。淨土資糧。具於平日。不知欲辦大事。喫緊尤在臨時一著。從前悠忽。到此延捱不得。從前迷著。到此糊塗不得。從前浮華。到此假借不得。從前歧路。到此徘徊不得。只方寸靈明用事。醒則立現蓮臺。迷則六道三



塗有分。穢淨頃刻異路。危哉危哉。究竟把握要訣。不外一心正念四字。宋儒謂平日工夫。正於此處用得著。即是此意。雖然。不豫辦於平日。而欲襲取於俄頃。泥惡人十念往生之語。不妨放寬眼下。恐經文所說。亦是如來萬不得已垂手之苦言。非便以西方作此輩護身符也。且人情莫不好勝而惡劣。獨於此事。甘以下下自許。亦殊可憫。

昔正陽帝君。鍾離祖師。見人臨命終時。神昏氣斷。不知所往。於一片黑暗中。隨風飄忽。望光即投。因而沉淪六道。苦無了期。爰著歸空真訣。發明六道之光。皆不可投。教人於將歸去時。回光內照。存神泥丸。堅持一念。願歸五嶽名山。自得從心所欲。不受三塗惡趣之苦。又嘗徵諸往事。每於垂危之際。有因恩怨未酬。繫諸懷抱者。一時眼光落地。神隨識往。竟得如念更生。報復不爽。甚或念瞋毒而爲蛇蝎。念正直而爲神明。載之感應事跡。不可悉數。蓋善氣屬陽。陽主升。念善者上升天堂。惡氣屬陰。陰主降。念惡者下降地獄。要皆從心所造而已。夫人未嘗學道。素乏鎮定之心。當懸崖撒手。諸難割捨。保無百魔俱集。萬念紛飛。黑風巨浪之中。慧舟安在。其能從容暇豫。謀諸方

寸乎。自釋迦如來。教人執持阿彌陀佛名號。慧遠。永明。龍舒。雲棲。諸公繼起。修淨土法門。備矣。而其最喫緊示人。則在臨終堅持一念。求生極樂。即得感佛來迎。西歸蓮界。是以三世諸佛。咸讚爲出世間法中第一捷徑。無如世人知此道者甚少。知平日須念佛功純。臨終始得正念不迷者更少。不得不大聲疾呼。願人人四大分散時。皆得一心不亂。佛力被加。咸登覺岸。

永覺元賢禪師曰。淨業之功。雖積於平日。而臨終最後一念。最爲緊要。蓋以生淨生穢。入聖入凡。唯此一念爲之轉移也。每見念佛之人。尋常俱說求生淨土。及臨命終時。多無正念。或貪生怕死。戀此皮囊。或目顧妻兒。難忍分別。或繫念家財。放捨不下。或因境界不順。抱恨而終。或因病苦逼迫。飲痛而去。既失正念。甘從淪墜。我今勸修行人。到此祇要諦信經文。堅凝正念。百般放下。念佛待盡。嗚呼。死門事大。頃刻來生。一念差錯。歷劫受苦。可不懼哉。

淨土聖賢錄載楊媼。年五十餘。得風疾。僵臥呻吟。有旅亭師過其居。其子請入視其母。媼顰蹙曰。病甚。師有好方否。師曰。病從身起。身從假合。

汝能捨身。病自去矣。曰。捨身奈何。師曰。汝但將身心放下。一心西向。繫念阿彌陀佛。阿彌陀佛能除一切衆生之病。但能至誠念佛者。阿彌陀佛自來救汝。惟患汝念不切耳。既別去。媼遂持佛名。默觀西方。日益懇至。居五月。語其子曰。佛至矣。吾當歸西。其子請僧十八。共唱佛名。媼起坐。西向而逝。

## 助行門

既知念佛。凡居心行事。若有一毫與佛相違。漫欲往生。猶北轅而適越也。則助行可不講哉。助行以戒殺爲首。余昔有同生錄之刻。所載戒殺放生名言事實甚詳。今惟補其所未備。及一切應修衆行。以爲助緣。皆不可闕也。

## 輯助行門

王龍舒曰。全持齋戒。又禮佛念佛。讀誦大乘經典。解第一義。以此回向。願生西方。必上品上生。所謂齋者。不食肉。不飲酒。不姪欲。不食五辛。所謂戒者。殺生。偷盜。邪姪。是爲身三業。妄言。綺語。兩舌。惡口。是爲口四業。貪欲。瞋恨。邪見。是爲意三業。總爲十戒。能持而不犯。是爲十善。若犯而不持。是爲十惡。全持十戒。乃生天上。持前四戒。加以不飲酒。是爲五戒。能持五戒。常不失人身。若修淨土者。不在此限也。若全持十戒。加以功德。固上品上生矣。若止持五戒而修淨土。亦不失中品上生。或上品下生也。若又不能持五戒。豈可以不戒殺生乎。殺爲五戒之首。是爲大惡。不殺得長壽

報。殺則得短命報。若止能持不殺之戒。以修淨業。已不在下品生矣。

明袁宏道。字中郎。萬曆中爲稽勳司郎中。謝病歸。卒於僧寺。兄宗道。弟中道。皆好禪宗。中道一夕課畢。入定。有二童子導之西行。見宏道曰。已居淨土矣。大都乘戒俱急。生品最高。次戒急。生品最穩。若有乘無戒。多爲業力所牽。流入八部鬼神衆去。予所親見者多矣。弟般若氣分頗深。戒定力甚少。夫悟理不能生戒定。狂慧也。歸五濁。如不能持戒。有龍樹六齋法現存。遵而行之。戒殺尤急。未有日啓鸞刀。口貪滋味。而能生此土者也。

又曰。齋僧。供佛。燒香。獻花。懸旛。建塔。念佛。禮懺。種種三寶上供奉。以此回向願生西方亦可。或爲世間種種利益方便善事。如爲子而孝。爲弟而悌。閨門盡善。宗族相親。鄉黨姻親。恩愛仁厚。以至事君則赤心爲國。爲官則慈愛斯民。或憐孤恤寡。或濟難振窮。或勸人爲善。或止人爲惡。一切善事。隨力而行。以此回向願生西方亦可。或爲世間一切利益。不拘大小多少。如以一錢與人。一杯與人。亦必起念云。以此善緣。回向願生西方。常使一念不斷。念念在彼。必上品生。

大觀間。有人遇故父於市。求教一言。父曰。學葛繁。問葛何人。曰。世間人。訪知葛爲鎮江太守。乃往見之。問其何以見重於幽冥如此。曰。予始日行一利人事。其後行二事。又其後行三事。今四十年未嘗一日廢。問何以利人。葛指坐間腳踏子云。若此物置之不正。則蹙人足。予爲正之。亦利人事也。又若人渴。飲以杯水。亦利人事也。唯隨事而利之。上自卿相。下至乞丐。皆可以行。唯在乎久而不廢耳。其人拜而退。葛兼修淨業以是回向。後有僧神遊淨土。見葛在焉。

元優曇大師曰。卵胎溼化。飛走蟲魚。皆未來諸佛也。貪生怖死。與人無異。何乃陳此肉山。樹茲炮烙。窮口腹之欲。極甘美之需。不知斷其命者。是出佛身血也。造殺害之深尤。絕慈悲之種性。生前福壽。暗裏消磨。死後沉淪。酬還不爽。修淨業人。當知心佛之心。方能履佛之士。

昔人云。良辰美景。人逢之而色喜。物遇之而心悲。人於此時。骨肉團圓。珍羞羅列。物於此時。母子離散。魂魄駭飛。故節日多殺生。最爲殘忍。試觀割一雞而衆雞皆鳴。屠一猪而羣猪不食。念及此。雖嘉肴在御。黯然而傷矣。

昔有句云。欲知世上刀兵劫。試聽屠門夜半聲。最爲悲切。

又曰。欲趣菩提。慈心爲本。凡修淨業。濟物爲先。觀夫飛禽走獸。水族游鱗。或樹網羅。或拘籠檻。穿腮反翼。繫足倒懸。將臨湯火之間。欲赴刀砧之上。憂悲恐懼。變智惛惶。望雲漢以魂銷。憶林泉而膽碎。雖知萬死。猶冀一生。顧盼哀鳴。以求救拔。所賴觸目垂憐。抽財贖命。開籠釋檻。斷縛解懸。施水焚香。合掌呪願。法施事畢。或縱陂池。或放林野。皆由佛道展演悲心。上自人倫。下至螻蟻。力苟能辦。無不放生。因茲勝利。回向西方。普願衆生。同成佛道。

智朗念佛放生說曰。夫欲全仁德。莫若放生。欲出苦輪。無如念佛。今立一放生之法。置一竹筭。每日事務之暇。念佛數聲。日貯一文。歲滿所積三百六十文矣。斯亦不費多財。不妨多力。何人不可爲之。惟貴久遠修持。終身不倦。於一載之中。不拘何時。行放生業。計其放處及年月日某甲放生若干。專願永無疾苦厄難之災。復增鶴齡松茂之算。再持佛名。誓無改變。而不得往生者。三世諸佛。便爲誑語。偈云。放生念佛兩重難。只貴當人心地堅。永祖傳

燈輝不夜。願提正念攝人天。

明蓮池大師曰。念佛不可以殺生。念佛以慈悲爲本。如不戒殺。功效減少。一切衆生。皆有佛性。歷劫以來。同爲眷屬。殺彼養我。情何以堪。奉勸念佛之人。每下箸時。常設此想。自能斷葷。早成淨業。即或不能長齋。能持六齋。亦得往生。若殺生則斷乎不可。

雲棲六齋月齋圖說。六齋每月六日。初八。十四。十五。廿三。廿九。三十。如遇月小。廿八廿九可也。月齋每年正五九三箇月持齋。不能三月持齋。必須三月戒殺。

淨土文說。念佛人如能斷肉爲上。如不能斷。且時三淨肉而減省。食若兼味。且去其一。如兩餐皆肉。且一餐以素。人生祿料有數。如此自可延壽。如早餐食素。其利甚多。一省業緣。二可清淨。三不妨善業。四至晚食葷時。不至厭此而欲彼。若以食素爲難。宜以食葷之費爲素食。則易行而可持久。若縱口腹之欲。亦無了期矣。語云。世上欲無刀兵劫。須是衆生不食肉。斯言可不畏哉。